

CHINESE - JAPANESE LIBRARY OF
HARVARD - YENCHING INSTITUTE
AT HARVARD UNIVERSITY
APR 29 1940

34

T 3193/0.82

江西通志卷第六十六

人物

光岳萃英江山得氣人傑之生每因於地大江迤西川原
秀麗牛斗舒華人物挺異理學文章忠孝節義由漢以來
蒐羅實備陶鑄栽培莫如

聖世有德必成有材無棄高山可仰景行足企爰表前型以
為後勵作人物志

南昌府

漢

陳夫乞豫章人秦二世元年劉項起夫乞萃徒蜀水之北築
壇絕巘以祭黃帝蚩尤寨於山之陽沛公入關夫乞率其
徒及之扛里從下咸陽後以都尉擊羽將軍定燕高帝六

哈佛大學漢和
圖書館珍藏印

年論功封高胡侯邑千戶孝文五年薨謚忠侯子程襲爵
薨無後國除後鄉里即其壇立高胡侯廟以祀之水旱疾
疫禱皆應千五百餘歲血食不絕有漢永平二年斷碑可

辨幸元龍筠州高胡壇記

按夫乞見漢書功臣表不詳何地人宋幸元龍記以為
豫章蓋本漢碑今漢碑惜不復可識矣舊志俱失載今
采補

章文豫章人高帝五年灌嬰定吳豫章五十二縣文以南昌
當諸道之衝進計於嬰築郡城嬰然之使文董其役勞來
版築經畫居多郡民德焉及卒祠而祀之於江濱歷代不
廢宋大觀二年賜額霈澤廟今城北章江廟是也南昌耆

舊記

按章文林志失載安志譌文為交今從白志

羅珠高帝時從灌嬰定豫章有功德於民卒官子孫因家焉
晉末有羅企生遵生今南昌柏林羅氏是其後也羅太史
洪先家譜備述其事同上

曾據其先封鄆鄆亡去邑為氏王莽亂據棄都鄉侯之豫章
家之蓋豫章之後分為南豐王介甫集

按羅珠曾據二人林志安志俱不載白志補

李淑豫章人為更始軍師將軍上書諫曰三公上應臺宿九
卿下括河海故天工人其代之陛下定業雖因下江平林
之勢斯蓋臨時濟用不可施之既安宜釐改制度更延英
俊因才授爵以匡王國今公卿大位莫非戎陳尚書顯宦
皆出庸伍資亭長賊捕之用而當輔佐綱維之任唯名與

器聖人所重今以所重加非其人望其毗益萬分興化致
理譬猶緣木求魚升山採珠海內望此有以闕度聖祚臣
非有憎疾以求進也但為陛下惜此舉錯敗材傷錦所宜
至慮更始怒繫淑詔獄

後漢書劉元傳後

按林志李淑傳以意撰述安志據史改正

何湯字仲弓豫章南昌人建武十九年顯宗始立為皇太子
選求明經擢湯為虎賁中郎將以尚書授太子世祖從容
問湯本師為誰湯曰沛國桓榮榮門徒常四百餘人湯為
高弟榮年四十無子湯為更娶生三子榮甚重之後拜郎
中守開陽門候上微行夜還湯閉門不納更從中東門入
明旦召詣大官賜食諸門候皆奪俸建武十六年夏大旱
公卿皆暴露請雨洛陽令著車蓋出門湯將衛士鉤令車

收按詔免令官拜湯虎賁中郎將上嘗歎曰糾糾武夫公
侯干城何湯之謂也

後漢書及注

按後漢書何湯無專傳附載桓榮傳其詳見于謝承書
中

程曾字秀升南昌人受業長安習顏氏春秋積十餘年還家
講授會稽顧奉等數百人常居門下著書百餘篇皆五經
通難又作孟子章句建初三年舉孝廉除海西令

後漢書

按程曾見後漢書儒林傳所載止此數語人物志稱其
七歲喪母號泣不異成人祖母憐其毀瘠嚼肉食之曾
覺有味即吐去云云不知出何書郡志所載亦同

喻猛

一作孟

字驕孫豫章人和帝時官蒼梧太守以清白為理

郡人頌之曰於維蒼梧交趾之域禹貢厥人島夸皮服大

漢維宗迪以仁德出自中臺鎮于外國鳩集以禮南人入服簡于帝廷功化畢植太平御覽

謀重字文疊南昌人和帝時除薛令以德行聞父卒哀號廬

墓致白兔馴擾再舉有道以高第除郡博士京輔都尉右

內史衛尉大司農詔加奉車都尉荊州長一作史政績甚

著卒人即所居立廟祀之今郡城南謀侯廟是也南昌耆

舊記

按謀重林志作仲

劉陵字孟高豫章艾人和帝時為長沙安成長先是長沙多

虎為百姓患陵到官逾月虎悉出境民復還其居入為侍

中車駕出祀南郊陵驂乘上升輿假寐陵跪曰陛下萬乘

主升輿宜正立雖早嚴欲寢不當上為天地靈祇下為百

姓觀覩邪上愧謝曰敬受侍中之言謝承漢書

羊茂字季實豫章人為郡功曹布被不覆軀布衣不周身郡

將察其廉遺之布被衣袴皆不受後官東郡太守冬坐白

羊皮夏處單板榻常食乾飯出界買鹽豉妻子不歷官舍

同上

按羊茂初為郡功曹後為東郡太守謝承漢書及太平

御覽所載宦蹟甚詳豫章書引烈士傳以羊為華前後

分作兩人者譌白志駁正

唐檀字子產豫章南昌人少遊太學習京氏易顏氏春秋韓

詩好災異星占後還鄉里教授百餘人元初六年郡界有

芝草生太守劉祗欲上言之以問檀檀對曰方今外戚豪

盛陽道微弱斯豈嘉瑞乎乃止永寧元年南昌有婦人生

四子祇復問檀變異之應檀謂當有兵氣其禍發於貴戚
延光四年黃門孫程揚兵殿省誅皇后兄車騎將軍閭顯
等立濟陽王為天子果如所言永建五年舉孝廉除郎中
時白虹貫日檀上便宜三事陳其咎徵棄官歸著書二十
篇名唐子後漢書

按前志列檀方伎而登嚴豐於人物檀之明經著書非
豐僅曉占候者比豐列方伎可也今易定

項誦字和叔豫章人順帝時為郡主簿有風義時太守為屬
縣所誣詔逮獄誦隨守入京師聽理要引自掾血出滂沱
齒皆墮地守以是得白謝承漢書

按項誦林志安志俱失載白志補

徐穉字孺子南昌人少為諸生學顏氏春秋京氏易歐陽尚

書兼綜風角星官算曆河圖七緯推步變易家貧常自耕
稼非其力不食恭儉義讓所居服其德屢辟公府不起陳
蕃為郡太守以禮請署功曹穉既謁而退蕃在郡不接賓
客惟穉來特設榻一去則懸之後舉有道拜太原太守皆
不就延熹二年蕃與僕射胡廣上疏薦穉宜擢登三事帝
問穉與袁閎韋著孰先蕃曰閎生出公族聞道漸訓著長
于三輔禮義之俗所謂不扶自直不鏤自雕至於穉者爰
自江南卑薄之域而角立傑出宜當為先詔以安車元纁
備禮徵不至穉先後為諸公所辟及會太尉黃瓊葬既反
郭泰聞之疑其穉也選能言生茅容輕騎追及于途容為
設飯共語稼穡之事臨別謂容曰為我謝郭林宗大樹將
顛非一繩所維何為栖栖不遑寧處及泰母喪穉往弔置

生芻一束于廬前而去衆怪之林宗曰此必南州高士徐
孺子也詩不云乎生芻一束其人如玉吾無德以堪之靈
帝初卒年七十二後漢書傳并注

徐胤字季登穉之子篤行孝弟亦隱居不仕少遭父母喪致
毀嘔血躬耕稼穡倦則通經貧窶困乏執志彌固不受惠
於人太守華歆禮請相見固病不詣漢末寇賊縱橫皆轉
相約敕不犯其閭後漢書

張載字仲宗豫章人任廣陵太守舉郡人吳奉一作素為孝廉
及解官歸奉齋金為禮載閉門不受奉以囊盛金夜投載
園中而去載覺追之不及乃齋金至廣陵還之謝承漢書

宗度高弘俱豫章人度字文叔為定陵令以土杯飯麥飯弘
為琅邪相以桑杯盛醬同上

按度弘二人林志失載安志載度而不及弘豫章書宗
度作宋叔平人物志又作宋慶姓與名均譌矣今仍白
志

鄧通字子文一作淵豫章西平人沈毅有學行官馮翊太守不
通賓客京師號曰鄧獨坐南昌耆舊記

李朝字伯丞南昌人有文章才桓帝時為魏郡監黎陽營謁
者和平元年立張公碑于黎陽朝作歌九章頌之洪适隸
釋

按九歌詞具載府志詞多不錄

周騰字叔達南昌人為侍御史桓帝當南郊平明應出騰仰
觀曰夫王者象星今中宮星及策馬星悉不動上明日必
不出至四更皇太子卒遂止史記天官書注

按周騰林志安志俱失載白志補

施陽字季儒

字倫

豫章人以德行聞漢末為舒令之官道經

江下時寇盜方熾陽遇劫奪盜已去陽視車席下尚有錢

五千追以予盜盜愧其義悉以所掠還之陽謂其已汚拒

不肯受付亭長而去

林志

按施陽前志俱載漢人豫章書以為晉人與志異

黃向字文舉豫章人晨步路中得珠珙一囊可直三百餘萬

求主還之主以其半謝向委去不顧

太平御覽

吳

聶友字文悌豫章人少為縣吏虞翻徙交州縣令使友送之

翻與語奇焉屬豫章太守陳斐以為功曹郡時見有功曹

斐見之問曰縣吏聶友可堪何職對曰此人縣閫小吏耳

猶可堪曹佐斐曰論者以為宜作功曹君其避之乃用為

功曹使至都諸葛恪友之由是知名及恪出軍圍新城退

還友知其將敗遺滕胤書曰當人強盛河山可拔一朝盈

縮人情萬端言之悲歎恪誅後孫峻忌友欲以為鬱林太

守發病憂死

三國吳志

按三國志聶友附見諸葛恪傳中林志安志謂恪薦為

珠崖太守不知何出白志據史傳刪正今從之

胡勃字欽宗南昌人為郡功曹嘉禾二年太守黃翊為人所

誣勃懷斧詣闕乞代翊罪翊得降宥後為廬江太守車騎

將軍吳亡入晉不仕

豫章書

按耆舊記胡氏在南昌最盛與羅氏鄧氏熊氏號豫章

四姓云考晉書范甯為豫章太守大設庠序取四姓子

弟皆充學生梁書張綰為豫章內史在郡述制旨禮記
正言義四姓衣冠士子聽者常數百人則豫章四姓其
來久矣 白志原跋

湛禮字秀登南昌人大帝時舉德行拜尚書倉部郎中撰書
儀十二卷行世 白志

按氏族大全以禮為漢人豫章書既以為漢人又以為
吳人兩處重見今從白志

楊迪豫章人大帝時為宣詔郎時廷尉隱蕃交結豪雋自衛
將軍全琮以下皆傾心敬待之唯迪及南昌羊道拒不與
通蕃後叛逆伏誅 三國吳志

龔石字顯光豫章人黃武元年會稽謝斐為郡守獲罪見收
石因帝出幸具表陳訴候駕于道頓首血出會大風雪流

血成冰帝駐車省章斐罪得理 林志

按南昌耆舊記石作碩顯光作顯先與志互異

胡休字吉甫豫章人為潯陽令有德化嘉禾生于庭白鸞翔
于野後遷九真都尉河東太守 豫章書

徐宗豫章人才能辯著名與孔北海融交善仕吳為中郎將
安志

按徐宗林志不載安志南昌耆舊記有徐宗無徐崇豫
章書既載徐宗又載徐崇絕無事蹟蓋宗與崇字體相
近譌為兩人也今仍安志

晉

雷煥豫章人初斗牛間常有紫氣及吳平紫氣愈明張華聞
豫章人雷煥妙達象緯要煥登樓仰觀煥曰寶劍之氣上

徹于天耳乃補煥為豐城令掘獄入地四丈餘得一石函
中有雙劍並刻題一曰龍泉一曰太阿其夕斗牛間氣不
復見煥以南昌西山北巖土以拭劍光芒豔發因遣使送
一劍并土與華留一自佩或曰得兩送一可乎煥曰本朝
將亂張公當受其禍此劍當繫徐君墓樹耳靈異之物終
當化去不永為人服也華得劍愛之嘗置坐側華以南昌
土不如華陰赤土報煥書曰詳觀劍文乃干將也莫邪何
復不至雖然天生神物終當合耳因以華陰土一斤致煥
更以拭劍倍益精明華誅失劍所在煥卒子華為州從事
持劍行經延平津劍忽于腰間躍出墜水使人沒水取之
不見但見兩龍各長數丈蟠繞有文章沒者懼而返須臾
光采照水波浪驚沸於是失劍華歎曰先君化去之言張
公終合之論此其驗乎

晉書

按雷煥事載張華傳中據晉史煥乃豫章人考樂史寰
宇記鄱陽初屬豫章漢建安十五年吳分豫章為鄱陽
郡迨晉時鄱陽久別為郡不屬豫章矣煥果鄱人史傳
不應仍稱豫章不知林志安志更有何據皆以為鄱陽
人白志改入南昌據史傳之文也今從之

喻合字匡孫南昌人好學不慕榮隱居廬山北阜布衣蔬食
三十餘年吳主皓晉武帝皆徵不起

林志

徐整豫章人博學好著述吳時官太常卿吳亡仕晉有豫章
烈士傳三卷毛詩譜三卷孝經嘿注一卷三五歷紀二卷
通歷二卷具鄭樵通志藝文略

南昌耆舊記

熊鴻豫章人晉初七辟不就

豫章古今記

鄧粲字文艷南昌人父暹崇邑令後漢末自南陽徙家焉粲善言詞博通經典眉目疎秀腰帶十圍任散騎常侍撰晉史十卷 太平御覽

按晉書鄧粲長沙人與此事蹟亦不同別是一人也粲林志及安志皆作燦通志作璨今從御覽又粲撰有晉史其為晉人無疑林志安志譌為三國吳人白志改正熊遠字孝文豫章南昌人有志尚縣召為功曹不起強與衣幘扶之使謁薦於郡辟文學掾遠曰辭大不辭小也請留縣太守察遠孝廉歷寧遠護軍元帝即位列為主簿上疏宜命將至洛修園陵救社稷卹遺黎又建議修農桑禁遊食時議美之建興初正旦將作樂遠諫曰孝懷皇帝梓宮未反人神共忿正始之初於是觀禮今榮耳目之觀崇戲

弄之好非納軌物有塵大教元帝納之累遷散騎常侍帝每嘆其公忠及中興建轉御史中丞時尚書刁協用事眾憚之遠奏免協官冬雷電大雨帝下書責躬遠復上疏陳三失累遷侍中出補會稽內史時王敦作逆沈充應之加遠將軍距不受保境安眾為務徵還拜太常卿加散騎常侍敦深憚之數月卒弟縉名亞于遠官鄱陽太守 晉書

按孝文著有御史大夫集十三卷

熊鳴鵠豫章人縉子官武昌太守能文章有文集十卷 豫章

古今記

羅企生字宗伯豫章人初拜著作佐郎殷仲堪鎮江陵引為功曹累遷武陵太守未之郡而桓元來攻江陵仲堪更以企生為諮議參軍仲堪多疑少決企生謂弟遵生曰殷侯

仁而無斷事必無成吾當死生以之仲堪果走文武無送者惟企生從焉路經家門遵生謂曰家有老母將欲何之企生揮淚曰今日之事我必死之汝等奉養不失子道一門之中有忠有孝亦復何恨元遂害之先是元以羔裘遺企生母胡氏及企生遇害即日焚裘晉書

按企生之從殷仲堪先昧於擇人然臨難不避有志士之風焉故錄之

喻歸豫章人晉世官西河太守撰西河記二卷廣韻

熊默南昌人晉世官會稽太守撰豫章志三卷南昌耆舊記

鄧忠岳豫章人著交州記三卷豫章書

俞益期豫章人性氣剛直不下曲俗遠適交州與豫章守韓

康伯書論檳榔以寄況著交州牋傳于世同上

宋

胡藩字道序南昌人少孤居喪以毀聞太守韓康伯見之曰當以義烈成名辟參郗恢征鹵軍事過江陵因說殷仲堪曰桓元意趣不常節下崇待太過非將來計仲堪不悅後元以藩參軍事元為劉裕所破出奔藩追及元於蕪湖元見藩喜謂張須無曰卿州故為多士今復見王修裕素聞藩直言於殷氏又為元盡節名參鎮軍軍事從征慕容超超軍屯聚臨朐藩言於裕曰賊屯軍城外留守必寡今往取其城而斬其旗幟此韓信所以克趙也裕乃遣藩與檀韶潛往即克其城從攻盧循循走豫章立柵左里藩破其柵循單舸走衆皆降裕攻司馬休之復以藩為參軍領游軍於江津休之臨馬頭岸置陳岸峭壁立數丈藩以刀頭

穿岸劣容脚指於是徑上隨之者稍多及登殊死戰休之
遂敗走伐秦之役藩統別軍至河東暴風漂輜重艦度北
岸魏軍牽得之藩氣憤率左右乘小船徑往河北射退敵
騎盡收所失而反又遣藩及朱超石追魏軍于平城魏騎
數萬合圍藩及超石不盈五千力戰大破之還參相國軍
事裕受晉禪藩入宋累官太子左衛率卒謚壯侯子西陽
太守隆世嗣 南史

按藩雖生于晉而仕為宋臣林志譌入晉白志據史傳
改正

鄧胤之南昌人事宋為征鹵長史吏部郎豫章太守光祿勳
世代衣冠號為名族子琬字元瑛為晉安王鎮軍長史行
江州事 南昌耆舊記

按鄧琬宋書有傳後佐晉安王子勳叛宋被誅林志不
載當以此

雷次宗字仲倫南昌人晉末入廬山事沙門慧遠篤志好學
尤明三禮毛詩隱退不受徵辟宋元嘉中徵至都開館于
雞籠山聚徒教授車駕數至資給甚厚久之還廬山後又
徵詣都築室鍾山號招隱館使為太子諸王講喪服經次
宗不入公門乃聽自華林東門入延賢堂就業卒于雞山
子肅之頗傳其業 南史

按次宗平生著述有豫章記毛詩序義二卷喪經傳一
卷文集三十卷見府志

齊

胡諧之南昌人宋世齊武帝領江州以諧之為別駕委以事

任武帝受禪用舊恩拜給事中驍騎將軍本州中正累遷
左衛將軍諧之風神瓌潤有識見每朝廷官缺及應遷代
密量上所欲用皆如其言既處要津頗有徵求之義永明
間遷都官尚書轉度支領衛尉卒謚肅侯同上
熊襄豫章人著齊典上起十代其自序曰尚書堯典謂之虞
書則附所纂述通謂之齊書亦名河洛金匱南齊書

梁

滕曇恭南昌人五歲母楊氏患熱思食寒瓜土所不產曇恭
歷訪不能得銜悲哀切俄值一桑門曰我有兩瓜分一相
遺還以餉母舉室驚異尋訪桑門莫知所在及父母卒水
漿不入口者旬日感慟嘔血絕而復蘇冬不著繭絮蔬食
終身每至忌日哀不自持豫章內史王僧虔引為功曹辭

不就王儉時隨僧虔在郡敬慕之號為滕曾子天監元年

陸璉奉使巡察風俗表言其狀南史

王綜南昌人武帝時官魯郡太守嘗役家僕于所部職田中

耕得銀三萬五千斤盡數送官又為丹陽尹部民獲蒼壁

一枚廣一丈六尺亦不私梁起居注載其事南昌耆舊曰

記

熊康之南昌人性至孝父被酒醉為奴所殺康之終身不復

嘗酒顏氏家訓

按熊康之林志豫章書俱不載

唐

沈季詮字子平洪州豫章人少孤事母孝未嘗與人爭皆以
為怯季詮曰吾怯乎為人子者可遺憂于親乎貞觀中隨

母渡江暴風母溺水死季詮號呼投江中少頃持母臂浮出水上都督謝叔方具禮祭而葬之 唐書

按季詮事見唐書孝友傳林志不詳引白志據史改定

胡敬之南昌人諧之五代孫幼聰敏于學多通性高簡為侍御史彈劾不避豪貴遷深州刺史卒于官高宗下詔弔問

賜絹歸葬 林志

楊相如南昌人神龍初舉進士補當塗尉屢上書言當世事

歷改晉陵陸渾又奏君臣政要三卷拜右拾遺開元末復

上書語益切直出為懷州別駕 南昌耆舊記

劉春虛字全乙新吳人時吳競為洪州刺史方直少許可獨

高其行改所居之里為孝弟鄉以表異之開元中舉宏辭

累官崇文館校書郎與孟浩然王昌齡相友善評者目春

虛詩情幽興遠思苦語奇可以傑立江表有集五卷行于

世 豫章書

按新吳今奉新縣林志以春虛為靖安人白志謂新吳

即今靖安縣俱誤又白志春虛重見寓賢今削彼存此

臧嘉猷進賢人開元中州牧吳競召之不赴著無求論以見

志競旌其鄉曰真隱里曰正吉天寶間採訪使以名聞驛

召至都堂論政左相李適之稱為學究天人識洞精微宜

加拔擢嘉猷以親老辭著德政八章以獻朝廷嘉其節賜

束帛歸命以其所居里為旌賢撰皇王十翼七卷 府志

按嘉猷本南昌人宋崇寧間析南昌東鄙之進賢鎮為

縣故舊志府志俱以為進賢人

熊曜南昌人祖九思察孝廉父彥方廣州錄參曜剛直有詞

學與達奚珣王維為文章之友開元中及第解褐貝州臨
清尉終曹參軍 林志

王季友豐城人博極羣書能詩舉開元進士李勉為江西觀
察使甚敬之表監察御史歷遷御史中丞杜甫有詩云丈
夫正色動引經豐城客子王季友羣書萬卷常暗誦孝經
一通看在于豫章太守高帝孫引為賓客敬頗久王也論
道阻江湖李也凝丞曠前後吾輩碌碌飽飯行風后力牧
長回首其賞慕之如此自號雲峰居士有詩集 同上

按唐乾元中元結嘗編沈千運于逖孟雲卿張彪趙徵
明元季川及季友七人詩曰篋中集以季友為河南人
合諸杜詩豐城客子之句則王似籍河南而寓豐城者
也林志安志俱為豐城人白志因之考南唐時有豐城

王子邛者為季友四世孫則季友為豐城人可徵也

趙炎開元末為當塗縣丞善丹青好結賓客李白贈詩稱為

南昌仙人趙夫子云 南昌耆舊記

熊暄南昌人家貧躬耕力學大曆中擢進士第授祕書省校
書郎著文選穎悟并文集五卷 白志

熊履素南昌人居南昌山三十餘年傾產買書聚徒講業暇
則荷鋤躬耕弟子自遠而至者與均衣食貞元三年卒于
家 南昌耆舊記

陶公達南昌人父雅温州別駕公達幼能屬文建中初詣闕
獻詩百首授同知澄城縣尉改美原丞貞元中副元帥渾
瑊奏辟為從事歷殿中丞侍御史 豫章書

李孝子逸其名霍王元軌孽子年十一母以獲罪于父被逐

孝子隨母別居南昌方二載母病割股鄰里以狀聞 林志

熊孺登鍾陵人元和進士官終藩鎮從事有詩名與白樂天

劉夢得相倡和白有洪州逢孺登詩云靖安院裏辛夸下

醉笑狂吟氣最麤劉有送孺登歸鍾陵詩云篋留馬卿賦

袖有劉弘書有詩一卷 豫章書

喻鳧南昌人開成中登進士第以詩名于時徙家睦州嘗與

方干賦詩往還事見宋元豐中黃廉所作喻府君墓表及

方干詩集仕至烏程尉有詩一卷行於世 浙江流寓志

按江右人物仕宦僑寓散見他省志書為本省地志不

載者甚多今直省通志續至特加採訂有徵必錄焉

來鵬南昌人詩思清麗嘗游楚寒食有詩曰分明記得還家

妻徐孺宅前湖水東當時誦為佳句韋尚書宙觀察江西

甚重之人物志

來鵠南昌人鵬之昆弟也為文師韓柳有詩才咸通進士聲

籍甚嘗觀穆宗實錄稱帝設史官執筆廷中日書起居注

號聖政紀鵠作頌以寓規諫著有來公集一卷 南昌耆舊

記

按來鵬兄弟林志失載白志據耆舊記人物志補入又

鵬與鵠明屬兩人全唐詩鵠一作鵬者訛

鄒垣新吳人宣宗龍潛時與垣為友嘗游至其宅後徵入朝

辭不赴賜號清隱居士人名其地曰駕山 府志

羅森南昌之西山人宣宗時官吏部侍郎以直忤宰相謫

吉州別駕子孫遂家吉之射洲 南昌耆舊記

傅祁字伯強豐城人弱冠豪勇過人為任俠乾符間王仙芝

攻洪州過豐城境祁率五百義士與戰於東岡之左自日
中至昃殺賊數百人賊益生兵義師遂潰祁死焉土人為
之立祠即今厚郭廟府志

熊袞南昌人先世避地入閩僦居建陽昭宗時袞為兵部尚
書性至孝時當亂離例無俸給父喪不能葬晝夜號泣天
忽雨錢三日始畢葬事餘錢悉輸諸官福建流寓志

南唐

王子邛豐城人季友四世孫舉進士為御史丞屬時艱與弟
兵馬使子邛子邦結民兵以衛鄉里及寇至子邛搏戰悉
眾揜之救不至遇害首雖殊猶跨馬走五十里許乃仆賊
大駭竟以是去鄉人祭之于社林志

羅仁節仁儉奉新人居晉城人以其姓名其地曰羅坊兄弟

以理學教授鄉里築精舍梧桐山下學者益眾李氏有江
南國相郡守交辟不能致獨與徐鉉游以布衣終仁節嘗
著書十四卷辨王霸仁義之說號宗孟集門人私謚仁節
曰中庸先生仁儉曰誠明先生縣為表其墓同上

涂虞南昌人仕南唐為本縣尉撰補豫章記豫章書

按豫章志記作者非一人吳徐整有豫章烈士傳晉熊

默有豫章舊志宋雷次宗有豫章記唐初有豫章古今

記失作者姓名南唐涂虞有補豫章記明朱謀埠有豫章舊

舊傳又有南昌耆舊記失名今雷氏記僅傳數條耆舊記

止傳內篇皆非足本昔人撰述湮沒者可勝道哉原跋

陳濬南昌人仕南唐為兵部郎中撰吳錄二十卷同上

羅穎南昌人涉獵經傳開寶中舉進士例以黃衣守選及後

主降宋穎再應鄉舉下第題詩漢高祖廟而死 同上

孫魴字伯魚南昌人家貧好學會廣明喪亂都官郎中鄭谷

避亂居宜春魴往師之遂以詩名嘗與沈彬李建勳及齊

已虛中相倡和仕南唐歷官宗正郎詩僅百篇而金山甘

露二篇尤膾炙人口 同上

按孫魴馬令南唐書有傳不詳何地人

毛炳豐城人隱居廬山時為諸生講得錢即沽酒嘗醉卧道

旁有里正掖起之炳瞋目呵之曰醉者自醉醒者自醒亟

去毋撓予睡後徙居南臺山數年忽書齋壁云先生不在

此千載只空山因大醉一夕卒 陸游南唐書

按毛炳豫章書失載林志不甚詳白志據史傳改補馬

令書載炳有詩集傳于世而陸書不載

南漢

王定保字翊聖南昌人少與曹松同棲廬山十年唐光化中

舉進士辟寧遠軍巡官時天下已亂定保辟地于廣州節

度使劉隱招為幕客梁末帝時隱弟劉龔將建國憚定保

抗直多異議遣使荆南襲國號南漢授定保禮部郎中知

制誥假祕書監使于吳楊行密見而奇之禮待甚厚累遷

中書侍郎平章事雅好著述老而彌篤有撫言十五卷文

集三十卷 十國春秋

宋

潘慎修字成德新建人仕江南為祕書省正字遣入貢會李

煜歸朝太祖擢慎修贊善大夫歷右諫議大夫翰林侍講

學士慎修風度蘊藉博涉文史善清言士大夫與之游者

咸推其雅尚惟寇準數毀之準知鳳翔謗議沸至慎修承命驗治反薦準有將相材所坐皆註誤不足罪真宗以為然嘗稱慎修長者因書姓名於御屏有文集五卷子汝士官工部員外郎直進賢院 人物志

周鷄 一作諤 字元輔豐城人當定昭二陵時邑人未甚知學諤

實倡之太平興國間五舉于鄉而四居首為韓忠憲億客億子絳與之游及絳為宣撫延諤俱至京以布衣召對晚得學究出身 林志

胡仲堯洪州奉新人累世聚居至數百口構學舍于華林山別墅聚書萬卷大設廚廩以延四方游學之士南唐時嘗授寺丞雍熙初年詔旌其門閭仲堯謁闕謝恩賜白金器二百兩淳化中州境旱歉仲堯發廩減市直以賑饑民又

以私財造南津橋太宗嘉之除本州助教許每歲以香稻時果貢于內東門五年遣弟仲容來賀壽寧節召見特授試校書郎賜袍笏犀帶又以御書賜之公卿多賦詩稱美仲堯稍遷國子監主簿致仕卒仲容字咸和咸平三年復至闕貢土物改大理評事屢被賜賚仲容建本縣孔子廟頗為宏敞後遷光祿丞致仕天禧中特賜緋魚卒年七十九以弟之子用訥為後試校書郎仲容弟克順端拱二年進士至都官員外郎三司判官仲容子用之洎從子用莊用舟並進士及第 宋史

陳恕字仲言洪州南昌人少為小吏折節讀書起家大理評事通判澧州以吏幹聞召入為三司判官擢度支員外郎以工部郎中知大名府真宗即位加吏部侍郎命條具中

外錢穀以聞怨久而不進屢趣之怨曰陛下富于春秋若知府庫充實恐生侈心臣是以不敢進真宗嘉之知貢舉避嫌凡江南貢士悉被黜又舉行貢舉非其人條然是舉以王曾為首每自歎曰吾得曾名世才也不媿于知人矣

遷尚書左丞集賢學士卒子執中 東都事略

何蒙字叔昭洪州人精春秋左氏學南唐時進士宋初為洛州推官通判廬州稍遷司門名對訪江淮茶政條奏稱旨賜緋魚真宗朝知梧州改水部郎中上所著兵機類要十卷以光祿少卿致仕 人物志

按何蒙傳林志太略白志改撰

胡順之字孝先奉新人景德進士知浮梁縣豪民臧氏素橫負租順之率吏至其家掩捕按致其罪郡遣教練使詣縣

入謁甚倨乃數其罪械而杖之郡吏斂跡歷青州從事大姓麻士瑤陰結貴侍匿兵械親黨僕從甚張陵蔑州縣會殺兄子事覺眾莫敢捕順之盡得其黨有詔鞫問士瑤論死仁宗初遷太常博士再上宰相書乞太后還政遷尚書屯田員外郎數論朝廷事為范仲淹所知然挾術尚權喜縱橫捍闔以失明廢 同上

黃茂宗字昌裔分寧人父中理築館于櫻桃洞芝臺間兩館游士常數百人故諸子多以文學知名茂宗高才篤行為兩館師太中祥符間國學試進士以木鐸賦主司拔王文第一而黜茂宗歸次尉氏遇翰林學士胥偃呈所對賦偃大驚拉與俱還以賦示主司曰使舉子能辦此何以處之皆曰王文不得為第一矣偃以實告皆相顧歎惋因抱賦

江西通志 卷六十一
上殿有詔特收試禮部擢高第授崇信軍節度判官已而流落不偶卒于杭 林志

袁抗字立之南昌人舉進士同學究出身以薦補桂州司法參軍撫水蠻寇融州轉運使俞獻可檄抗權融州推官事平遷衡州推官累國子博士知南安軍擢提點廣南東路刑獄還為三司判官以尚書金部郎徒益州路時三司歲市上供綾錦鹿胎萬二千匹抗言蜀民困憊願少紓餘力以備秦中他日之用是年郊祀蠲其數之半黎州歲售蠻馬詔擇不任戰者却之抗奏朝廷與蠻互市非所以取利也金山前後五部落仰此為衣食一旦失利因而侵侮不知費直幾焉臣念蜀久安不敢奉詔尋如舊制除江淮發運使召為三司鹽鐵副使改少府監卒抗喜藏書至萬卷

子陟少刻厲好學善為詩終殿中丞 宋史

按抗字立之見本傳林志以為正之誤

陳執中字昭譽怒之子也始以父任為祕書省正字真宗不豫大臣無敢及建儲執中上言太子天下本不可不早定擢右正言康定間以資政殿學士為陝西同經略安撫招討使與夏竦同知永興軍議事多不合徙知涇州慶曆四年召拜參知政事諫官孫甫蔡襄言執中剛愎不才不可任以政仁宗不聽時章得象杜衍為相賈昌朝與執中參知政事每議事執中多與之異甫襄言既不用因求去事下中書甫本衍所舉用而二人者俱有名望於是中書奏乞留二人仁宗頷之明日衍出知兗州甫襄亦罷頃之得象免相昌朝與執中同相拜同中書門下平章事集賢殿

大學士兼樞密使皇祐初以疾求罷五年復拜同中書門
下平章事執中當國人不敢干以私四方問遺無及門者
會張貴妃薨治喪皇儀殿追冊皇后禮官以非禮迎上意
仁宗嘗詢執中而不能考正典禮以對悉奉行之深為時
論不與至和二年罷為鎮海軍節度使判亳州還上節鉞
改右僕射觀文殿大學士封黃國公徙河南曹州過京師
以疾賜告就第加司徒岐國公致仕卒贈太師有司謚曰
榮靈詔謚曰恭 東都事略

羅孟郊南昌人徙居興寧縣天聖間舉進士第三累官翰林
學士乞歸養母茅葦蕭然母冬月思膾孟郊解衣入池取
魚供母鄉人目其池為曾子湖 人物志

過昱字彥明豐城人母早卒刻木為像早暮漱盥必進
愈久愈勤閔世俗鮮知事親乃葺古人孝道類三十卷目
曰至孝通神集寶元間第進士常攝全州事正民偽版均
平稅役其斷訟必反覆務盡其情至施刑恒以惻怛為念
終都官郎中居定林自號定林老叟 林志

按人物志以過昱為景祐進士與此互異

李從字伯順豐城人多貨能友弟厚俗有司征課急貧不能
償者代之輸且勤講學子三孫十一仕者八人 同上

李琮字世京從之子闢館延師豐餼廩以待學者邑之東鄙
有長隄江水湍激為民患琮輸財于官易以石遂為永久
之利子秉為高安酒正前官賒酒六斛秉以問琮曰隱而
不言非忠也發而有罪非仁也力可及而弗為非義也遂
捐千餘緡庚其費而覆其瓮代者得以理去 同上

李秉字子正豐城人琮之子寶元及第文學行誼過人同年
司馬光范鎮雅相引重累官至都官郎中宿州刺史所在
以惠政稱同時過昱純孝何延世清直與秉並稱為三郎
中同上

按李從父子祖孫三世並有名德豫章書失載

李亢字君起秉之從子以舅晏殊恩試將作主簿泉州曹
臨川丞在泉郡將貪墨僚屬皆厚獻以取薦亢與帥曹獨
無所奉郡將尋以賊敗二掾免焉在臨川臺使者以南豐
缺令命亢移攝政化大行居數月以病歸同上

趙庶明字吉甫新建人少以功名自許寶元間詔求直言庶
明詣闕上書萬餘言大略謂銀夏契丹不可恃其恭順而
不備又言趙元昊必叛朝廷以為狂妄斥建州未幾元昊

果叛上思其先見除徐州推官遷祕書省校書郎知惠州
政先慈惠民甚便之罷歸卜築于孺子亭側人物志

按林志趙傳不甚明晰白志增補

黃注字夢升其先金華人後徙分寧兄弟皆好學尤以文章
意氣自豪舉進士得丙科初任永興主簿調公安南陽素
剛不苟合負其所有怏怏無所施卒以不得志死于南陽
其文博辯雄偉意氣奔放不可禦平生所著有破碎集南
陽集公安集凡三十卷六一居士集

按黃夢升宦蹟文章不甚著稱幸與歐陽公同年而志
其墓名遂以傳及見黃山谷跋墓志後云叔祖夢升學
問文章五岳縱橫制作之意似徐陵庾信不幸得人間
四十年爾使之白髮角遂于英俊之場未知與歐陽孰

先孰後也其推重若此惜所著三集今皆失傳林志載其弟茂先名灝景祐進士官太子洗馬亦有文名原跋

黃庠字長善洪州分寧人博學強記超敏過人初至京師就舉國子監開封府禮部皆為第一比引試崇政殿以疾不時入天子遣內侍即邸舍撫問賜以藥劑是時庠名聲動京師所作程文傳誦天下近世布衣罕比也歸江南以病卒宋史

黃龐字富善分寧人庠之弟學尚氣節皇祐進士為京兆法曹將謁府賓吏告曰法曹庭參拜庭下此例也龐不可解冠裳於庭而去隱居芝臺書院子準博洽工詩有雲樵居士集人物志

按黃龐傳林志太略白志增撰

李冕字君儀豐城人秉之弟少自求學與王允甫弟晏殊于京師辭歸殊曰比當郊天吾奏汝一官謝曰冕自厲以圖後業茂元少寡舅宜恩之明年茂元補太廟齋郎冕久之亦調崇安簿縣民謝叟無子名他姓兒以致富晚婢舉一兒叟垂死戒曰吾故窶藉汝兄助吾致富分財當優之後婢兒壯詣縣乞還兄姓令欲判可冕詰婢兒不服更訴于州蔡襄為運使行縣即訊冕迎白曰法順人情今與人同艱辛以致豐裕終奪而窘之非人情也且重違其父志襄曰非主簿言吾幾誤矣續為舒州司理治懷寧盜獄平反三人時王安石為州判因欲抵懷寧令罪冕不可司理院月評物價冕特昂絹直安石詰其故曰計賊以絹為量歲饑民多為盜賊不滿匹則緩於死不爾三絹殺一人矣

安石服而謝之 同上

黃廉字夷仲分寧人庠之從弟嘉祐進士歷任州縣擢利州路轉運判官遷司農丞為監察御史裏行建議兩制近臣及轉運使各得舉士詔各薦一人河決曹村壞民田廬受詔安撫所活二十五萬人元祐初為戶部郎中改陝西轉運使 林志

何延世字楸之豐城人慶曆進士為都官郎中有清直聲與過昱李秉齊名繼知連潮二郡與周茂叔為僚友雅相愛重為詩清灑有韻族子莫字亨道鄂州功曹參軍既仕益刻苦讀書臨政明決如老吏從子時升亦工古文詞有名

太學號半隱山人 人物志

袁陟字世弼南昌人抗之子少有才名與王介甫蘇子瞻曾

子固善未冠登慶曆進士知當塗縣王介甫居金陵嘗手寫陟詩一軸以遺其友陟讀書最苦竟以癯瘠不起自為墓志挽章有詩文十卷號遯翁集 同上

李廷瑞字雲紀豐城人教諭歷南劍延平書院山長母歿廬

墓踰年有白蓮生廬前田畝中人謂孝感所致 林志

余良肱字康臣分寧人天聖進士調荆南司理參軍屬縣捕得殺人者良肱驗其傷與刃異疑之白府請自捕逮未幾更獲真殺人者民失財物逾十萬逮平民數十人或附吏耳語良肱廉知其為盜亟捕治賊盡得改大理寺丞出知湘陰縣奏蠲逋米數千石通判杭州江潮漂民廬舍壘石隄二十里障之後為三司判官方關陝用兵朝議貸都下民錢良肱力爭會大臣亦以為言事遂寢內府出腐幣

售三司吏將受之良肱請付文思以奉帷幄歷遷光祿卿知宣州治為江東最子卞爽最知名 宋史

黃庶字亞夫分寧人茂宗從子登嘉祐進士歷州郡從事攝

康州治有聲仕不得志遂刻意于文詞有詩云漁家無鄉

縣滿船載稚乳公私鞭笞息醉眠聽秋雨又題怪石詩云

山鬼水怪著薜荔天祿辟邪眠莓苔大都皆奇語云所著

伐檀集子大臨庭堅各有傳 府志

徐禧字德占洪州分寧人熙寧初呂惠卿領修撰經義禧以

進士充檢討上治兵策歷官給事中丁師伐西夏鄜延帥

沈括請城永樂詔禧與李舜舉往相其事李稷主糧餉城

成禧與舜舉括俱還米脂砦明日賊數千騎趨新城禧亟

往視之與舜舉稷俱行括獨守米脂比及永樂賊傾國而

至禧自率士卒拒戰賊眾分兵迭攻重圍既合城中乏水

士卒渴死者大半括退保綏德城永樂城陷禧與舜舉稷

俱沒神宗哀禧等死贈禧吏部尚書賜謚忠愍 東都事畧

按宋史載禧好言兵呂惠卿引之故不次驟用永樂之

舉亦禧寡謀輕敵以至于敗以其死事一節故錄之

黃介字幾復南昌人熙寧九年同學究出身知四會縣新興

民岑探為機鬼惑眾新州捕其家繫獄探誑言吾能三呼

陷州城從者百數至城下言不效皆散去新州聲張以為

豪賊挾眾攻城經略使遣將童政捕斬官軍所遇薪水行

商皆殺之介自陳于經略請以所領士丁不隸部曲且言

政所劾首級莫非王民荼毒之禍百探不足云 黃山谷集

字觀復分寧人六歲能詩登元豐進士知海鹽縣時導

松江入海民多役死明年議欲再舉本請罷之歷京畿運使京邑吏牘多弛本承命遍行勾校雖他司事悉以聞歷知揚州兼淮南東路兵馬鈐轄歲旱出繫囚數百人天大雨遂有年取郡事悉調理之公私兼裕流民皆復

府志

胡田字雲從奉新人元豐間參鄜延副總管曲珍軍事敗夏人于金湯以功進忠訓郎左殿班直轉右侍禁元符間同從弟良孺上書論瑤華宮事編管本州

同上

潘興嗣字延之新建人慎修之孫以蔭授將作監主簿少孤篤學與王安石曾鞏王回袁陟俱友善初調德化尉以不能俯仰上官棄官歸築室豫章城南日讀書其中六十餘年手鈔至數百卷年八十七卒集六十卷

南昌耆舊記

吳居厚字敦老豫章人舉進士第元豐初提舉河北常平又

為京東路轉運副使即萊蕪利國兩監官自鼓鑄贍足一路拜天章閣待制陞都轉運使又請鑄大錢以一當二歲出二十萬緡佐關陝兵食神宗曰居厚於分職之外卹及它路非材智有餘不能爾元祐初朝廷稍更新法以寬大為政於是御史言居厚苛刻責散官黃州安置尋知廬州紹聖初以集賢殿修撰為江淮荆浙等路發運使旋復舊職疏支家河通漕楚海之間咸賴其利召為吏部郎權尚書加龍圖閣學士知開封府修奉永泰陵居厚為橋道頓遞使出知和州創將理院及鑿藥使病者有歸多所全活後朝廷設坊安濟大槩如居厚所建云除戶部尚書拜尚書右丞遷中書門下侍郎大觀初請老提舉鴻慶宮退居豫章築室東湖之上久之起守本郡徙帥河東過闕復拜

門下侍郎知樞密院事乞改重幣為當三以息貪夫盜鑄之患時遼使至居厚言於徽宗曰盟好不可違也願益敦信誓以安敵情徽宗嘉納焉以武康軍節度使知洪州踰年卒贈開府儀同三司

東都事略

按吳居厚安志訛入臨川白志改正

李安國字元佐南昌人少穎悟力學始知南城剖決無留牘常累月獄空無人改宜黃縣罷不便民事二十餘條尋判贛州以史正志洪邁薦除知常州開除無名之逋十八萬省楮幣百萬始至軍無數月之儲比及三年錢以緡計者七百萬米以斛計者三百萬淳熙初擢戶部侍郎

南昌耆

舊記

黃大臨字元明分寧人庶之子紹聖間知萍鄉縣或諷其過

慈大臨曰字民令職也豈其操三尺與百姓讎敵哉徒知龍泉其治如萍鄉秉法自持私謁不入提舉張根行部雅聞其賢折節禮下之

人物志

黃庭堅字魯直洪州分寧人幼警悟從舅李常見之以為一日千里舉進士為葉縣尉又為國子監教授初蘇軾見庭堅詩於孫覺之坐上異之後過李常于濟南見其詩文以為超逸絕塵獨立萬物之表者由是名聲始震知太和縣又監德安鎮召為校書郎為神宗實錄檢討官逾年為著作郎母喪服除除祕書丞提點明道宮紹聖初議者以實錄多誣失實責涪州別駕黔州安置以親嫌移戎州監鄂州稅僉判寧國軍知舒州召為吏部員外郎丐郡得知太平州庭堅嘗作荆南承天院記部使者觀望宰相趙挺之

意以庭堅有幸災言坐除名編管宜州卒年六十一始庭
與秦觀張耒晁補之皆游蘇軾之門號四學士庭堅特

西詩派祖庭堅世以配蘇軾稱蘇黃云 東都事

洪朋字龜父南昌人父民師為石州司法參軍性孝以毀卒

朋幼孤受業於祖母文成君李氏手不釋書落筆成文尤

長于詩舅黃庭堅嘗謂龜父筆力扛鼎異日不患無聞兩

禮部不遇早卒遺藁有清非集 人物志

洪炎字玉父與兄朋弟芻羽俱以文詞名世號四洪舉進士

為穀城令坐元祐名人貶竄復知潁上譙縣並有循政累

官著作郎祕書少監罷高宗初召為中書舍人時方倥偬

除目填委炎操筆立成訓詞典雅同列歎服有西渡集嘗

編列仙臞儒事蹟三卷劄曆夕言又身金菜家小說行于

世 南昌耆舊記

洪芻字駒父有詩名靖康初為諫議大夫坐事流沙門島嘗

著豫章職方乘老圃集及編楚漢逸書若干卷 人物志

黃叔達字知命庭堅弟雅負音節人有臭味投者推挽之不

遺力意所不可雖衣冠貴人亦唾辱之與彭城劉師道友

善嘗之京師同師道謁法雲禪師于城南夜歸過龍眠李

伯時叔達著白衫騎驢道中搖頭而歌師道負杖挾囊于

後一市皆驚以為異人伯時素善画因寫為圖邢惇夫作

夜歸圖詩以歌咏之叔達小詩樂府皆清麗可愛有詩四

十首附見山谷集中 同上

潘淳字子真新建人興嗣之孫淳少穎異好學不倦淹貫經

史百家之言師事黃庭堅尤工詩曾鞏知洪州乞錄興嗣後尚書右丞黃履復以淳為請補授建昌縣尉陳瓘劾蔡京言者目淳為瓘親黨坐奪官不以介意歸自稱谷口小隱所著詩并詩話補遺傳世 同上

黃叔敖字嗣深分寧人廉之季子元祐進士乙科累官廣東轉運判官兼提舉市舶上疏言嶺表地偏冬無霜雪瘴癘所鍾其所產不足以奉玉食再三力請為奸黨察疑所中免官未幾復職徙荆湖北路轉運判官廉訪使時李滋怙勢侵擾州縣叔敖以奸狀聞詔鞫得實竄滋衡州中人側目紹興初除給事中上疏論朋黨未革不可以為治比來上封事者頗有告訐細故摺撫隱匿非求言本意除兼侍讀遷戶部侍郎進尚書以通議大夫致仕所著有文集十

卷春秋講議三卷奏議十卷 同上

孫發字妙仲豐城人幼穎悟勤學元祐進士補崇仁尉民有盜宗人財就執而父病死因誣宗人所傷發按問非是民大窘醉其盲弟廢一手聞于州州疑其冤遂移獄有司迎指發力辨不已因作截臂行以告在位者後知永豐縣以母老遂致仕時人高之有敷山集若干卷發孫鄉貢士奇字師穎從子進士哀字子稷俱以文行稱哀有楚堂文集豫章野錄炎興傳信記補白氏六帖奇有玉隱類藁周禮備檢詩榦總辨等書世號三孫先生 豫章書

黃得禮字執中豐城人元祐進士為柳州推官建中靖國初應詔言事其略云嘉祐熙寧之法仁祖神宗之所為也而主熙寧者曰必為之更變主嘉祐者曰必為之守常分曹

為朋迭立勝負宿怨快於私門實禍歸於公家朝廷顧何
所賴惟天子建中和之極擇其善者從而增損之此行法
之要也人才實難口語疑似無四凶之罪而加以流竄之
刑瘴霧蠻煙不死不已遺骸旅櫬雖死不還士有持平如
彭汝礪葉濤之徒其言未必見省此風不革異日必有以
伏刑都市參夷五族之法聞於上者矣願朝廷退人以禮
宰輔為國受言變縉紳鍥薄之風增社稷靈長之福此任
人之要也時皆以為篤論

人物志

按黃得禮傳林志不詳安志采補

胡僧孺字唐臣奉新人直孺之兄在元祐紹聖間聲稱甚著
直孺十詩中所謂阿兄驚世才者是也陸放翁嘗言胡唐
臣少汲兄弟俱為江西名士其朋友亦皆知名不媿金昆

玉友同上

胡直孺字少汲奉新人紹聖進士為洛州司戶與錄曹同治
獄嘗有盜夜殺人於智井莫能獲乃執鄰人疑似者即誣
伏直孺却其獄竟雪之時議重貶元祐諸賢直孺為之營
解遷監察御史出知平江府擢江淮湖浙發運使入為戶
部侍郎遷工部尚書除知南京金人再犯京師直孺率民
兵入衛力戰不利見執久之得歸欽宗慰之曰孤城圍閉
天下兵至者獨卿與張叔夜耳高宗立除知洪州進刑部
尚書兼侍讀多所獻納御書文物多師古朝廷半老儒于
扇以賜改兵部兼權吏部有生還錄及西山老人集二十
四卷

白志

按科目考胡直孺紹聖四年進士奉新人安志重見高

安白志刪彼存此

胡良孺奉新人直孺從弟以漢川錄事參軍應詔論瑤華宮
事有綠衣上僭之語崇寧初被禁錮五年詔收敘而卒

同上

范瑄字次房靖安人紹聖進士大觀中獻時政利害八事令
南漳上言監司州縣掎克誅求徽宗覽章示執政曰范瑄
小臣忠于報國非瑄朕不聞此言且令召瑄察其才欲待
以不次執政不可遂自乞知鬱州復奏嶺南漕臣徐惕偽
作御筆處分收買珍禽異獸犀玉珠貝瑋瑁翠羽孔雀玩
好瑰異以萬數騷動兩路民不聊生封章再上惕遂罷前
後奏事剴切深中時弊官終左朝散大夫

同上

按范瑄紹聖進士林志譌作紹興

余卞字洪範爽字荀龍皆以任子恩試卞為校書郎爽博學
多大略累為湖北安撫使勾當機宜文字討蠻有功知沅
州徽宗即位改知靖州章惇憾其不附已除名竄封州久
之起知明州未行以言者罷

宋史

按安志已載余爽而不及余卞白志據史傳補入

范璿字舜文豐城人政和進士授虔州議曹改節度推官時
盜起為畫策守備城賴以安歲輸賦于郡胥吏為奸璿典
其事蠹弊盡革薦知甌寧縣既滿縣人爭留之列其治狀
十事于郡太守魏矼以聞召對便殿問何以得民如此曰
臣知為陛下愛民耳拜兵部員外郎遷樞密院檢詳文字
以與秦檜不合出知南劍州未幾請祠歸有松谿集

林志

按虞伯生松溪集序范公名濬與志偏旁小異今從志

序中又云胡忠簡論王倫劄子蓋出范筆胡以范親老
疏上必有危禍而自上之胡南遷范亦遂去國家居終
身此段傳中失載今采附于後

原跋

呂延年字商老靖安人政和進士紹興間調知南安縣李綱
力薦于朝轉江西宣諭司議事攝瑞州招捕盜賊旬月盡
平以功歸同列知蘄春浩然勇退

同上

黃彥輔字伯彊豐城人得禮之子政和進士善著論刊落陳
言歷官所至有聲事辦而不擾陳瓘謫合浦彥輔以書慰
之瓘答書曰長沙問鵬不如忠州論藥三復來一喜無間
言爲人豪爽醞藉嘗在京師樊樓酒酣賦月詞十篇皆以
望江南歌之都人聚觀謂謫仙墮世明日詞傳禁中後爲

吉水令卒

同上

按彥輔安志不載白志從林志采補

黃次山字季岑庭堅族子宣和元年試國學第一以庭堅名
在禁錮復抑置第四歷信陽州學教授池州司理參軍靖
康初遷博士坐與李綱厚善謫監虢州銅場建炎二年擢
尚書員外郎未幾撫御京東西路使還乞外補遂知筠州
又乞監當以歸不內艱終喪復吏部郎官入對力陳日食
之咎又進校旗大閱之法會金兵大至淮南告捷次山言
策功行賞勸沮所係因條上三策乞解六將軍逗留者之
節鉞授偏裨立功者朝廷旣罷劉光世兵枋命呂祉代之
次山言光世固可罷祉雖若可用然統師御衆非其所長
其言卒驗靖康以來號爲宗程顥兄弟學者不能深明其
旨轉爲迂怪紹興初諫官極論其弊有旨戒飭學者次山

時權禮部郎官與侍郎董蔡爭之于朝事雖直而謗議起矣出提點荆湖南路刑獄居數月以言罷主管亳州明道宮凡九年卒危太朴集

按黃次山人物志作黃彥平與林志所撰本傳皆失實
白志據說學齋彙補入次山所著有三餘集見林志而
危文失載

徐升字公允豐城人宣和進士主萬載簿值凋殘之後開墾田土公私交裕丞盱江時寇盜日張升至分兵破毀巢穴戮其渠帥而散遣餘黨知蘄州冰雪自守罷官不持一錢歸事母極孝自奉與妻子至約云卒左司范璿銘其墓

林
鄒揚字廷光豐城人為人介特自信宣和進士解褐樂平丞

靖康時勤王師起縣當閩廣荆蜀市里騷然揚至即發常平米給過軍義倉米賑流民師行賴以無擾時建康造戰艦責取異材揚謂檣楫松舟自古有訓異材非吾產也辭之郡欲調發弓手揚曰弓手之設以其知曉內地勢熟鄉曲人情捕緝追呼或賴其力若戎旅之役非其所長曷若以外縣起發之費充郡城教閱之賞軍民不兩便乎其議論慷慨疏通之變皆人所不敢發者尋卒于官

同上

鄒邁字擇可豐城人宣和進士為越州僉判嘗曰孔孟不以讀書為學學非博覽載籍之謂也必有得於心體於身推之於民者游夏不以著述為文文非屬辭之謂也意以出辭辭以達意而已魏公自謂平生只讀論語之十篇及至老死百未施一若此者可謂學矣溫公自謂不能為四六

而平生所著如穀帛藥石皆適于用若此者可謂文矣又曰身不能無過而鄉里未能告我以過其自克如此客趙忠簡鼎幕受知遇特深當世名士如胡康侯安國高柳崇閱喻子才樗皆與為友

豫章書

李誼字宜言南昌人與其昆弟並工文章號江西三李又偁為鼎州士曹歿櫬浮江西歸遇風舟幾覆誼號泣請死風遽息宣和間舉進士累官諫議大夫奏牘以百數高宗時除中書舍人時秦檜主和議一日當撰報聘國書誼不肯執筆以祕閣修撰出知廬州卒于官

南昌耆舊記

熊方字廣居豐城人靖康鄉舉貢上庠參澧州軍事雅善書高宗內禪大書堯舜二字表進有旨付祕閣除本路帥幕性好養生之術注道德經二卷著象山集豫章錄臨汝編

江又補東漢年表因名其堂為補史

府志

徐俯字師川洪州分寧人以父禧死國事授通直郎累官至司門郎靖康中張邦昌僭位時工部侍郎何昌言與其弟昌辰避邦昌皆改名俯買婢名昌奴遇客至即呼前驅使羅之建炎初致仕奉祠內侍鄭謚識俯于江西重其詩薦于高宗胡直孺在經筵汪藻在翰苑迭薦之遂以為右諫議大夫中書舍人遷翰林學士俄擢端明殿學士兼權參知政事宰相朱勝非言襄陽上流所當先取帝曰盍就委岳飛俯獨持不可帝不聽罷知信州子祠卒俯有俊才尤長于詩有東湖集

宋史

按呂居仁江西詩派圖徐俯其一也東湖集今不傳

范士衡字正平豐城人從臨川李德遠劉淳叟遊每謂春秋

一經其說曼衍皆傳注害之作尊經辨春秋本末其詩文清越雅健謝良齋諤編次而序之晚事朱文公文公稱為老友云 林志

按林志范士衡傳與人物志范仕衡事各不同白志附錄仕衡傳後考豐城縣志載士衡不及仕衡當各是一人今另傳

高宗時直隸
之戰炎以廷上奉殿內封獲監編制于工西直具書
昌永經時昌皆必各前買戰各昌成墨客至頃知前驛對
后門河靜泉中飛時昌習立制工陪封河昌言與其策
余制字福川共阻心寧人以父喜及因車對直將累官至
入蘇東蕙手素因各其堂燕蘇史 秋志

江西通志卷第六十七

人物

南昌府

宋

羅從彥字仲素本南昌人寓閩之劍浦聞楊時得程氏學慨然慕之時為蕭山令從彥徒步往從之游甫三日即驚汗浹背曰不至是幾虛過一生講易至乾九四爻時云伊川說甚善即走洛見程正叔問之既歸卒業築室山中終日端坐弟子至者益多每教李侗令靜中看喜怒哀樂未發時作何氣象朱子謂龜山倡道東南士之游其門者甚眾然潛思力行任重詣極仲素一人而已嘗著遵堯錄八篇大要謂藝祖開基列后繼統若舜禹遵堯而不變迨元豐

改制創為功利之圖浸名邊鄙之禍為書四萬言靖康中擬獻闕下不果紹興初以特科授博羅主簿未幾卒沙縣楊淵每詣從彥必竟日乃返謂人曰奧學清節真南州之冠冕也學者稱為豫章先生淳祐間追諡文質

人物志

按宋史羅從彥南劍人弘簡錄作羅源人林志安志不載人物志豫章書皆云南昌人白志疑因學者稱豫章先生之故今南昌縣西南七里有地號羅家原為仲素故居明嘉靖間萬光祿思默嘗即其地構屋數楹與鄧定字李見羅王塘南鄧潛谷章本清諸子讀書其中延羅文恭洪先主講席文恭手書其額曰羅原書屋蓋寓宗仰豫章之意況徐孺子稱南州高士而當時楊淵亦稱仲素為南州冠冕則仲素之為南昌人不誣也

樊昌時進賢人建炎初以書生為閣門祇候舍人王虎謀逆駕巨艦欲襲洪州昌時偕弟昌盛率鄉民力戰從兄昌諤捐貲以佐兵費昌時昌盛及昌諤子士通俱死之虎亦敗衄紹興初府帥高衛以事聞贈昌時修職郎昌盛保義郎封昌諤為修職郎鄉人廟祀之

林志

范仕衡字平甫豐城人居查村性至孝父歿出必泣告于墓而行母久患目疾乃禱于神若有以藥授者忽不見母服之遂愈特奏名授欽州推官攝二守咸著廉能之譽

人物志

志

胡敦詩字可興靖安人敦實之弟紹興八年進士時年三十二與海昏劉氏為姻不數年劉頓貧既登第劉請離昏敦詩指日為誓未幾廣帥陳橐過南昌欲妻以女敦詩力辭

竟尋劉盟明年除廣州清遠簿橐雅敬之留幕中舉裴寬
劉寧事相激勉或謂之曰坡仙書劉庭式事引羊叔子為
證且云功名富貴人也子其是矣敦詩正色曰東坡書事
特厲薄俗耳夫婦三綱之首安計富貴乎聞者賢之 林志

王鈇字承可分寧人本之子蔭授通仕郎建炎間通判鄒州
累擢敷文閣直學士知湖州告祠適番禺請帥上即命鈇
有吳聽者為海盜之魁鈇密授軍士擒獲戮之於市因盡
籍舟艦區別疆域毋得復持兵械聯以保伍而稽其出入
自是宿害頓除番禺俗葬親必大會賓客費至不貲以是
貧者多不克葬下令悉禁止之士大夫貧不能葬及流徙
不獲歸者率捐俸為資助卒邦人立祠祀之 府志

按王鈇林志作鐵未詳孰是

雷觀字仲立豐城人借同邑鄒邁范璿並以文學著名應貢
入國學與陳東友善借疏請復用李綱帝從之及白時中
罷以張邦昌為相觀復上言詆之賜出身與館職遷太常
博士復請重紀綱惜名器以抑冒濫忤黃潛善以臺評謫
監當紹興間兩倅潭州料院 同上

陳特立字致柔奉新人弱冠應科連中三舉紹興二十一年
進士乃登第授南城縣尉知宜春縣毀大姓偽券歸其田
于民以憂去邑人罷市相弔再知麗水秩滿歸行李蕭然
官至臨賀太守 林志

莫將字少虛分寧人以父援任子歷仕縣令有聲紹興間除
太府丞使金還除工部尚書充京西宣諭使以敷文閣學
士知明州改知廣州將在朝以學問自結主知握節出疆

尤熟敵人情偽孟太后鑾輿南返將之力居多贈端明殿
學士 豫章書

許叔達字商叟奉新人紹興進士授崇仁主簿民有尸其子
於親屬之門者屢按不能竟獄叔達摘發其隱誣者伏辜
知寧鄉縣賑貸有條時推為一路荒政之最調知宜春卒
叔達生平以清苦自持張南軒忝稱之曰持身冰玉每飯
不足高卧讀書淡然自若 林志

胡敦實字觀光靖安人紹興進士僉漢陽幕職辰倅何兗以
獻言得罪時秦檜方興羅織獄當路承之以自媒敦實被
命力辭不受劾褫一官盧溪王庭珪慰之曰緣此受責其
勞多矣後知臨賀軍事奏減上供之半請憲司損折苗之
直以寬民力利及兩路又知全州敦實學問精粹深于左

氏飛雲皆文皆簡古有玉澗集同上

余紹祖字光裔奉新人紹興進士為潭州觀察推官民盜海
商既獲而窮治不承紹祖募人於江淮間得舊舟示之盜
遂駭服及知廬陵縣歲旱郡督課不少緩紹祖持告身付
吏求去郡將改容謝之秩滿積俸二千緡折券弗取歸裝
書數篋而已尋通判江陵府辟守巴東命下以疾終郡人
舒邦佐挽之曰東南官數任來往只單車 同上

李惟深字彥溪豐城人年十九第紹興進士授都昌丞臺檄
錄囚事竣為憫囚賦以獻知宜黃縣適淮孺宿重師募軍
和糴百需猥至惟深曲諭富民不戒而集又上言募軍之
法輕用人命徒耗糧廩前此揀發弓兵曾不能北向發一
矢及休息什不一歸以此知士非素練是謂棄之事竟得

寢後奉祠終于家

同上

王樞字致榮豐城人通羣經尤邃于春秋少游胡安國之門
紹興進士參吉州軍事郡給軍衣有濫惡者衆謹庭中莫
能制樞正色折之乃定知瑞金縣改丞岳州所至每詣學
宮執經講論諸生受其指者多與計偕再為鼎州丞會茶
寇絡繹道路不通或欲焚山絕茶或欲官自收鬻樞建議
為長短引以便負販至今賴之終常德府通判有東谷集
二十卷 同上

曾光字元明豐城人紹興進士嘗判融州強寇李接擾旁郡
聞光名獨不入境移知房陵房西馬所經校牽者執券要
索不已光給予如律卒羣譟廷下悉擒械之謂其校曰朝
廷所需者馬爾於若輩何有今遣他官以馬入并劾若不
職計將安出其人謝過戢衆以去 同上

孫伯溫字南叟豐城人幼端莊讀書敏悟紹興進士調龍城
教官改知新昌縣為治先教化後刑罰豪民競田伯溫繩
以法遂中萋斐見謫新昌人有平田謠紀其事後再知臨
湘縣嘗師楊慈湖簡又從漕使楊方受為己之戒每謂學
者當知三坑四闕之病曰利欲坑文藝坑枯寂坑惟義與
利是生死關惟誠與偽是虛實關惟敬與肆是安危關惟
動與靜是吉凶關博學工詩文有集若干卷其歿也龍城
人士為之立祠 同上

袁鳳字子儀奉新人方九齡作詩有坐觀天下本無事何必
昌陽作引年之句識者異之登紹興進士初尉理定其俗
相習鬻妻鳳曰夫婦人倫之首可爾邪白府嚴其禁室家

始相安攝荔浦縣嘗籌利民三事運帥張紫微喜曰使屬邑皆如是吾可卧而治矣遷衛州錄事參軍同上

徐時動字舜鄰豐城人師事胡文定公安國遂傳其學以歸第紹興進士為虔州教官改吉州未及歲移疾遂不復仕著孟子說十四卷西江錄三卷師門答問一卷同上

按舊志有京鏜傳宋史謂鏜為韓侂胄畫策陷趙汝愚薦劉德秀立偽學之禁得罪天下萬世云云未可列于人物今削鏜父三郎附雜記中

喻樗字子才南昌人梁安州刺史愈藥之後藥賜姓喻累傳至樗徙居嚴州建炎進士趙鼎去樞筦居常山樗往謁因諷曰公之事上當使啟沃多而施行少啟沃之際當使誠意多而語言少鼎奇之引為上客及鼎都督川陝荆襄辟

樗為屬高宗親征樗見鼎曰公自度此舉果出萬全乎或姑試一擲也當思歸路毋遺君父憂鼎曰策安出樗曰張德遠有重望居閩莫若使為江淮荆浙福建宣撫使俾以諸道兵赴闕宣撫來路即朝廷歸路也鼎入奏遂起浚知樞密院事浚至執鼎手曰此行舉措皆合人心鼎笑曰喻子才之功也樗往來鼎浚間多所裨益頃之以鼎薦授秘書省正字兼史館校勘鼎浚相得歡甚人知其將並相樗獨言二人宜且同在樞府他日趙退則張繼之立事任人未甚相遠則氣味雖似人爵寒玉馬有一不合則必更張是賢者自相背戾矣後如其言又常曰振車者遇艱難則相詬病及車之止也則忻然如初士之於國家亦然先是樗與張九成並言和議非便檜既主和言者希旨劾樗與

九成訕謗出知懷寧州通判衡州致仕檜死復起工部員外郎出知蘄州歷浙東常平提舉以治績聞

弘簡錄

按樗本南昌人僑居嚴州後爲玉山尉復家玉山前志列于寓賢謂本嚴州人僑家玉山今改正

徐如晦字光伯豐城人隆興初應詔陳十事爲慈利主簿有殺人祭鬼者久繫未決如晦語上官曰殺人者死法也妻子無罪可盡戮乎定罪止其人復有怙勢殺人反指死者之妻妻被誣復將論決如晦白其冤時苦旱忽雨人以比東海雪冤婦之應再調萬載丞卒有文彙數百篇

林志

簡世傑字伯俊自進賢徙居靖安隆興進士初任靖江府司理參軍外邑以盜上府凡六七人世傑推詳非是後果獲正盜時參政范成大爲帥將劾令而賞之世傑力辭且謂

令誤非有他成大益賢之暨鎮蜀辟入幕府汲引蜀士皆一時翹傑改知蒲圻縣政本豈弟行之以信不設科條民不忍犯知賀州嶺外官自鬻鹽人以其爲病遂一切罷之

豫章書

按楊誠齋所撰簡伯俊墓志稱其學問通古今議論守大體所居不赫赫所去民見思云

李修已字思永豐城人父希說以學行教授鄉里修已登乾道進士參與國軍事時陸九齡分教是州盡告以躬所操履謂當息其已學求所未學遂與爲師友既又事朱文公益講伊洛之學議論森嚴臨事敏決兩令寧鄉衡陽皆劇邑有政聲當路交薦將召以嘗哭故相趙汝愚忤時遂通判成都府繼知成州竟不得召用韓侂胄當國聞其才名

諷使攀附修已笑而不答有文集十卷

林志

李大性字伯和端州人其先積中為元祐名人始家豫章以父任入官孝宗朝進典故辨疑百篇上嘉之擢大理司直工部郎陳傅良彭龜年黃度楊方以言事相繼去大性抗疏言朝廷清明乃使言者無故去國臣所甚惜恐端人正士望風去者將不止此可為寒心孝宗崩光宗以疾未能執喪大性稱檀弓成人有兄死而不喪者聞子羔將為成宰遂為衰若待金使祭奠然後執喪則貽譏中外豈特如成人而已久之累遷戶部尚書開禧將用兵又疏陳利害忤韓侂胄意出知江陵府充荆湖制置使江陵兵殘之後繼以饑疫首請賑貸凡三十八萬緡奏流移還業者皆免征權歷遷兵部尚書卒謚文惠李氏自積中三世官于朝

父子兄弟相師友而大性與弟大異大東並躋侍從為名

臣云 宋史

胡侂字仲藩奉新人乾道進士知湘陰縣大姓以武斷相高吏不敢問侂方按治援者旁午不聽悉置之法諸豪始讜服焉調湖北憲參提舉陳謙平蠻戎移侂告謙郡縣兵弱請名旁路諸軍遣將分討遂擒首亂并拒捕者數十百人餘盡降侂之策居多所著有尚書要義當世急務湖北利害漢唐治安龜鑑及集宋名臣奏議

豫章書

高鼎字國器新建人乾道進士授鄱陽主簿時給事吳芾帥江西一見輒加寵禮郡有大政必使預聞武寧多寇未獲委攝尉事鼎以計搜捕寇盡就擒調樂平縣饒之德興有岸地敷鹽米額民甚苦之鼎條奏利害悉與蠲除改丞宜

春獄數百人皆逋租者引至庭下約限遣之其後不加箠而賦集吉有疑獄憲司檄鼎推鞠得其情囚多貸死秩滿退歸西山洪井故人留正京鏗在政府屢致書幣招之不

起閒居二十年以壽終

林志

范飛卿字升甫豐城人舉乾道鄉薦授龍陽主簿飛卿居家孝友行誼著于鄉女兄老而貧迎事之如母有老僕不良于行廩之終身其學以明善誠身為本所著有東軒思說易元虛辨七史曆義三正辨本朝典故等集十三種及詩文百餘篇門人李劉狀其行

人物志

王允文字文伯豐城人乾道進士有聲從陸子靜學精詣力踐諸公爭館致之彭龜年薦于楊萬里示以近作虞雍公碑有諒彼高宗之語允文引詩

文武三人

謝曰一字之師也龜年論韓侂胄死謫所嘉定更化允文袖諫草謁樓內翰鑰且以劄述本末鑰具疏繳進龜年始被卹典士論稱之有棲碧類彙

林志

黃談字子默分寧人官至朝奉郎有詩名張安國推作江西從社頭有澗壑詩集并詞行于世

人物志

趙汝偵字和仲進賢人昭成太子六世孫也雖帝胄而澹然守布衣之操以漕貢仕永興縣丞真德秀嘗以固窮之節許之年未六十棄官結廬於縣南蛟坑之帶山

林志

劉子虛字君實靖安人以文學孝友稱隱于桃源山自號支離翁釋善權賦古風十二韻贈之詩不具錄

人物志

范德動字光卿豐城人璿之次子淳熙鄉薦知龍泉縣茶寇大擾居民盡室逃匿德動因險立柵寇望風去擢知容州

以最聞名赴闕上言廣西官弛鬻鹽禁而驅之買鈔是舍
坐收見獲之利而指擬于歲月未必得之錢失官司坐守
之權而求售于商賈之手豈長便哉命集議擢瓊管安撫
改知肇慶府帥臣上其治狀名赴行在卒

林志

鄧元字南秀豐城人淳熙進士分宜主簿時夏潦暴至邑屋
皆沒民爭走山無所得食元不及白州發廩粟以濟所活
甚衆再辟廣西帥屬時宜州蠻欲叛奉使者檄往約束之
即退聽命有遺橐曰漫堂集

豫章書

黃疇若字伯庸豐城人得禮曾孫少孤外大母杜教養西
熙中舉進士知廬陵縣嘗以六月督畸零稅疇若念
艱食取任內縣用錢三千餘緡代輸兩年治為諸邑平
遷殿中侍御史知成都蠲積逋十餘萬罷官吏冗員吏良

代輸六年市估錢二十萬二千四百緡又別立庫儲二十
五萬三千緡期于異日接續代輸糴米十五萬石以足倉
儲初沈黎蠻屢犯邊疇若鏤榜曉以禍福青彌兩羌遂乞
降會董蠻犯龍鳩堡龍門隘皆以有備而退遷兵部尚書
以煥章閣學士致仕所著有竹坡文集

宋史

孟程南昌人淳熙進士調襄陽監酒稅奉帥檄浚水渠溉田
數千頃知澈寧遠二縣皆正賦籍吏不敢欺邑計亦裕遷
臨江通判有詩文千餘篇自號冰雪林主人

豫章書

于革字去非豐城人年十三作賦有聲淳熙進士知房州時
金兵猖獗自棗陽至光化荆門悉無全堞房居其中革獨
繕甲治兵防扞關隘暨逆曦內訌人暗騷動革獎忠義戢
津梁曦僞命不能東出後為漕臣劾罷宣撫吳玠疏理其

功制帥劉光祖又以房陵士民之詞刻上事遂白有竹國
集若干卷革嘗與朱晦庵游後祠學宮

府志

按于革事林志不詳今改定

王衡仲字仲平豐城人淳熙進士丞相京鏜欲引以自近衡
仲謝弗就授新昌簿居官善推鞠以得事情部民有爲人
訐毀墓者邑莫能定部使者檄衡仲就辨之至則每杖植
表而錄證者詰墓所在三詰之各指一處輒加榜已而證
者以實告其獄乃決遷漢東丞時漕使趙方檄攝郢且以
所捕寇數十人約令至境行誅衡仲按其事多註誤乃悉
縱遣復命曰非真盜也已爲明府未減矣方躡之爲審計
時輪對言今以放散新軍失士卒之心以拘毀白帖失邊
豪之心以納粟限銓失巨室之心以新引失商賈之心以

新會失天下之心又言孔子曰兵食可去而信不可去今
急于兵食而先去其信一旦汲汲尚能以空言欺人而使
之我聽哉詞甚激切出知建昌軍值歲大旱衡仲默禱曰
得雨則郡可爲也入境望郡治而舍大雨如注郡人迎而
喜曰真刺史雨新城地名黃恒磔與汀鄰境其民險健騷
動令不能制衡仲欲以兵往屋間難之衡仲奮銳不顧卒
擒其渠衆乃帖服所著有楠

荆文集 豫章書

盛溫如名遜以字行豐城人少有大志時方擯程氏學遜獨
宗其說讀書稽古以聖賢爲己任領淳熙鄉薦時盜蜂起
遜舉義兵擒渠魁數十人盜又阻山據險謀再舉遜單騎
往諭以禍福遂駭散去定嘗功授奉節郎以親老辭創書
院于盛家洲顏之曰安樂廬朱晦菴嘗邂逅于楚甚器重

之過訪其家者三屢贈以詩所著有伊洛統宗太極圖解并詩集傳世後與于革劉充並祀學宮號三傑祠

按林志盛遜事不詳白志改補

熊恪字子敬豐城人朱元晦帥長沙道出清江謀館客于彭

龜年彭薦恪以有宿諾辭元晦義之平居和緩言動不妄

嘗云學不遷怒之方有二平日當涵養臨事當持守又為

忍銘以示門人張洽洽答曰乳犬攫虎伏雞搏狸精神之

至也但恐學者知忍而不知行所當忍宜勗以懲忿之箴

而復揭忍為懲忿之訣恪遂作懲忿記學者稱曰謹節先

生林志

黃端卿字正仲疇若子以祖賈為江州征官歷上饒廬陵縣

丞補授茶陵時賊起桂東真垓峒踰月破安福安仁又入

茶陵焚掠未及城五里端卿求援諸司未報勢益急乃部

分兵士遏截之明日率兵賊賊却乘勝以進兩暴至賊

大集執端卿使前導入城卿叱曰我為軍使恨不勦汝

豈從汝害百姓邪遂遇害事聞詔立廟雲陽門賜額忠顯

同上

丁鏞字仲熊新建人以伊洛之學倡于江右弟子雲集與陸

子靜為友領淳熙慶元嘉字三舉歷官曲江縣簿朱元晦

知南康軍聘掌教白鹿書不就時與往復論學自號瓮

天先生所著有春秋要辨通釋書辨疑王霸論性理大

旨諸集子季敏博學能文徐鹿卿為撰墓志

按林志一統志丁鏞傳太略今據世美集改撰及考王

衡仲所撰丁仲熊墓志絕不及與朱陸為友往復論學

江西通志卷六十七人物

原跋

之事或其子孫託以取重原跋
 裘萬頃字元量新建人淳熙進士有孝行節操其學惟以存
 心為主粹然一出乎正由樂十簿遷大理寺丞力求補外
 以便祿養差江西撫幹時真西山為安撫甚器重焉所著
 有竹齋詩集卒贈通直郎楊忠湖誌其墓以默識稱之端
 平間知隆興府吳潛疏言萬頃清名厚德矜式士林博學
 高文源流前輩平生出處與以司直李燔相似人物志
 按林志及南昌耆舊記敘表通直事太略

甘同叔字叔異豐城人力學精思工于吟咏淳熙進士參桂
 州民曹攝荔浦縣有節軒集若干卷同邑鄧元與同叔齊
 名鄧之天才甘之學力皆人所難到同上

舒邦佐字輔國靖安人淳熙進士為善化主簿長沙輸送苗
 米三十萬斛郡委邦佐領其事每歲輸納例有所餽號曰
 優潤錢邦佐舉而寄諸帑遷衡州司錄參軍茶陵民訴胥
 長受賕逮鞫則曰嘗許而未與守倅將罪訴者邦佐言吏
 蠹易滋民冤難伸於是訴者得從寬減紹熙甲寅朱文公
 帥長沙邦佐以疾乞歸文公賢而從之嘉定中授通直郎
 卒所著有雙峰猥橐九卷舒通直墓志

按舒邦佐事人物志所載略白志據李大異所撰墓志
 改定

揭飛雄字少穎豐城人有文學教授鄉里登淳熙進士未及
 唱名而卒劉副樞謂其為人外若不勝衣言呐呐不能出
 口而不為不義屈亦不以一毫不義取予其為文典麗精
 微詩亦閑雅平淡有舊山集人物志

劉充字實之豐城人累試禮部不遇乃益博究羣書其古賦大篇有凌雲摩空之氣律句稱是後任衡州監獄真德秀提刑淮東聞其賢辟入幕授從仕郎提刑司幹歸朱晦菴過豐城甚敬之與于去非盛温如號三傑並祠學宮同上

徐璿字深甫豐城人九歲即喜為詩教授何蘊奇之授以經學象山先生亦稱為異稟有覺溪集又從吏部吳曾受曆學盡得其傳著起算法及考異以布衣終李劉銘其墓同上

徐倫字彞仲豐城人璿之族弟慶元進士為袁州推官待次七年安貧篤學唐宋諸詩手鈔神契既至官牋筆軍賦民詞皆以身任當道交薦右史張嗣古尤亟稱賞遭父喪哀毀卒有詩橐若干卷同上

范應鈴字旂叟豐城人開禧進士知崇仁縣通判撫州改蘄州差知吉州贛叛卒賊殺主帥應鈴密遣謀捕之部使者劾其輕發鑄一官起廣西提點刑獄召為金部郎入見言公論不出于君子而參以逢君之小人綱紀不出于朝廷而牽于弄權之閹寺言皆謹直識者避之除軍器監名見奏國事大且急者儲貳為先上為之動容累遷直寶謨閣湖南轉運判官兼安撫事峒獠倡亂帥憲招捕逾年未平應鈴調飛虎等軍討之未一月全師而歸擢大理少卿以病請告不允未幾卒應鈴不以得失利害動心當官而行無敢撓以非義所至無留訟繩奸吏不少貸家居時人有不平不走官府而走其門為不善輒相戒曰毋使范公聞所著有西堂對越二集徐鹿卿稱其經術似兒寬決獄似

雋不疑治民似龔遂風采似范滂理財似劉晏而正大過之人以為名言 宋史

按人物志應鈴謚清敏而史傳不載

王孝友字順伯豐城人學有淵源凡陰陽性命之奧必洞究所以與魏了翁稱為修士李文清宗勉屢致書幣聘之著性理彞訓造化六合論海潮論撮古今名臣事跡為正監哀風土人物為豐水志卒徐鹿卿志其墓 人物志

羅必元字亨父進賢人嘉定進士真德秀入參大政必元移書曰老醫嘗云傷寒壞證惟獨參湯可救之然其活者十無二三先生其今之參湯乎調餘干縣趙福王府中驕橫不法至是以汝愚墓侵奪民山必元為直之淳祐中通判贛州賈似道總領京湖剋剝日甚必元上疏以為蠹國脈

傷民命似道銜之移汀州為丁大全按去起幹行在糧料院錢塘有海鯁為患漂民居詔方士治之都人鼓扇成風必元上疏力闢之度宗朝以直寶章閣兼宗學博士致仕卒年九十一 宋史

陶夢桂字德芳進賢人嘉定進士歷任至朝請郎岳州通判出入江淮荆蜀二十年所至愛民力修軍政有廉能稱退隱平塘簡澹自處以壽終 豫章書

李義山字伯高豐城人修己之子嘉定進士授太宗正兼金部輪對言為善不可有疑心去惡不可有悔心并陳進善不能無疑者三去惡不能無悔者三繇是罷出知吉州後以湖南提舉攝帥漕楚俗尚鬼有妖覲譚法祖假禍福惑人義山曰此張角孫恩之漸也斬法祖燬其祠歷階至中

正大夫所著有後林遺藁思過錄

林志

黃竑字持國豐城人彥輔曾孫紹熙進士仕至廣西提幹李

修已嘗稱其讀書自具一隻眼議論不隨人脚跟為文筆

力奔放嘗作賦以莊周馬遷自况有留皮集

同上

范仲武字季克慶元進士知太和縣徙倅安豐道由洪都帥

問以治狀首以蠲放下戶餘賦為言帥曰富民得產而不

收攬尸得錢而不納若一蠲之則受惠者斯人耳仲武曰

信如所論但催之不已則受害者貧民下戶非富家攬尸

所憂帥善之在安豐料賦給餉無缺保守箕谷扞蔽兩川

其功為最劉光祖疏其治狀召赴行在未對而卒

同上

王休字致美豐城人嘉定鄉薦兩擢第一下筆千言一旦盡

焚去取眉山集讀之累月為文沛然似之作心要十篇費

王而賤伯表忠而聖佞著誠而惡偽以晏子踊貴履賤之

言為藥石以相如子虛大人之賦為酒色謂淵明不夷不

惠為避世之尤謂仲舒劉蕡之策或緩或激皆愛君之實

識者避之

同上

熊炎字時中豐城人嘉定進士授靖安教諭攝縣事復教授

瑞州遷廣東儒學副提舉同知英德州嘗撫傳記所載孝

節忠義廉循吏為六傳有裨風教

人物志

王武子字文翁豐城人開禧進士為江夏尉臺檄視旱武子

請蠲逋租禁屠牛罷關征勸假貸以資細民寬米值以來

商販使者悉行之調知荔浦縣察民有能奉親事長服田

力穡畏訟樂輸者許以名聞輒加旌勸時架閣裘萬頃被

召請贈言武子謂曰人謂朝士寧拙疎毋便習則不失其

在我者萬頃奉其言未期月而出人謂武子不惟勉己且以淑人 林志

徐鹿卿字德夫隆興豐城人博通經史後進爭師宗之嘉定進士有司第其對居二詳定官以其直抑寘第十調南安軍學教授張九成嘗以直道謫居鹿卿撫其言行刻諸學先是周惇頤程顥與其弟頤皆講學是邦鹿卿申其教曰是理義之學復立養士綱條學田多在溪峒異時征之無藝農病之鹿卿撫恤無逋租者辟福建安撫司幹辦公事郡多火災救護有方會都城火鹿卿應詔上封事言積陰之極其徵為火指言惑嬖寵溺燕私用小人三事尤切改知尤溪縣德秀守泉辟宰南安前罷科斂之無名者明版籍革預借決壅滯達冤抑邑以大治歲饑處之有法富者

樂分民無死徙以母喪去服闋主管官告院幹辦諸事審計司遷國子監主簿改樞密院編修官權右司會方大修劉克莊王邁以言事黜鹿卿贈以詩言者并劾之太學諸生作四賢詩知建昌軍擢度支郎官兼右司入對極陳時弊改右侍郎官兼敕令刪修官宰相以甘言誘鹿卿退語人曰是牢籠也吾能為宰相私人乎言者以他事詆鹿卿主管雲臺觀起為江東轉運判官歲大饑人相食鹿卿命掩捕食人者尸諸市出本司積米三千餘石減半價以糶出緡錢萬有七千以予貧民所活數萬人移浙東提點刑獄史彌遠之弟通判温州利韓世忠家寶玩籍之鹿卿奏削其官改直寶章閣知寧國府擢太府少卿兼右司入對請定國本正紀綱立規模時事多艱人心易搖無獨力任

重之臣無守節仗義之士願蚤決大計上嘉納之兼中書門下省檢正諸房公事逾年權吏部侍郎以疾勾祠遷右文殿修撰知平江府召權兵部侍郎累疏告老致仕進華文閣待制卒贈四官鹿卿居家孝友喜怒不形恩怨俱泯宗族鄉黨各得歡心居官廉約清峻毫髮不妄取一廬僅庇風雨所著有泉谷文集奏議講義鹽楮議政彙歷官對越集手編漢唐文類文苑菁華謚清正

宋史

丁中字汝明父歿四月遺腹生中育于祖杉巢君受業于程吳齋寶祐三年領鄉舉補太學上舍與陳宜中等上書攻丁大全咸淳四年復上書乞調諸路兵馬并力救襄不報中知國事已去束裝而歸治家有方守祖宗法以施濟為心徐鹿卿扁其室曰韋軒入元隱居不仕詳見胡希寅所

撰韋齋行狀中

五溪丁氏世業集

按丁中新建人所著有春秋續辨四卷周禮考異四卷君臣懿範五卷古今括異十卷韋軒文集十卷甲子紀年圖

徐經孫字中立豐城人璿之子寶慶進士累遷監察御史劾

京尹厲文翁不報即日出關去召為祕書監太子諭德遷給舍陞太子詹事時賈似道議買公田以省糴運經孫極論非便忤似道意免閒居十年卒謚文惠時著作郎陳著亦乞罷買公田坐補外經孫所薦陳茂濂為公田官在嘉興聞經孫去國曰我不可以負徐公遂以親老謝歸終身不起時人稱為三立

人物志

冷應澂字公定分寧人寶慶進士調廬陵簿以廉能著轉靜

江府司錄參軍治獄平恕范應鈴薦知萬載縣大修學舍
招俊秀教試之旌其通經飭行者以勸歲饑下令收養棄
孩父母不得復問全活甚多葉夢鼎一作知素州列其行
事風厲餘邑知德慶府洞獠徧城六十里應激諭以禍福
知其勢解即厲士馬出不意一鼓擒之屬縣租賦諉道阻
不至為期曰首輸者與減分未至則償所減民惟恐後不
一月訖事遷本道提舉常平兼轉運使改直寶章閣知廣
州主管當路經略安撫司領漕如故常曰治官事當如家
事惜官物當如己物今國計內虛邊聲外震安得清談以
誤世陶士行亦望之吾師也自聞襄樊受圍日繕器械裕
財粟以備倉卒後賴其用屢平大寇未嘗輕殺一人即笞
杖亦加慎至其臨事斷決雖勢要不為之撓奪 宋史

胡大訓字世文豐城人紹定鄉薦剛正嫉邪遊國學時憤權

相史嵩之奪情起復同黃愷伯等上書數其罪被逐作捲

堂文辭先聖歸隱于桂陂 人物志

李龍庚字彝甫豐城人紹定鄉貢補太學生謝方叔當國龍

庚叩閣上疏言方叔耄昏子弟交通貨賄條上五欺十賣

之罪京尹承望風旨欲置獄國子司業蔡抗率屬爭之獲

免未幾方叔竟罷龍庚特奏名第三以桂陽軍判官終于

任子毅通撫州推官 林志

南宮靖一字仲靖分寧人端平進士嘗著小學史斷二卷謂

作史者當于莊襄之元年東周既滅特書周亡然後進秦

使接周統于莊襄之季年呂政嗣立特書秦亡然後正其

姓氏別為後秦斯實錄矣今東周末滅遽進昭襄之秦呂

政嗣立猶冒嬴秦之姓于周則絕之如恐其不亟于秦則進之如恐不及是非逆置謂之何哉其持論如此自號坡

山主人 人物志

甘茂榮字榮可豐城人紹定進士調常德府戶曹轉江西兵馬鈐轄司幹官平生以節操自勵所至寡偶竟淹抑以終著定菴集雁峰猥橐困學樸詞等書 林志

按林志不列所著書名

雷宜仲字宜叔豐城人師張洽得朱子緒餘補大學生史嵩之以右相開督府陰植姦黨與弟巖之勢焰熏灼嘖笑可生殺人會天變宜仲上書指斥其罪由是流落久之擢淳祐進士第二為右司諫與賈似道不合去經界廣東還入奏言廣東進上供銀率抑買為民害有旨蠲之又乞復故

相吳潛官仍賜謚以勵臣節復濟邸封爵以厚天倫錄江西二陸之後以勸學徒德祐間除禮部尚書尋為廣東經略安撫使偕文丞相起義勤王丞相入衛又與信州謝枋得招諭軍民固守嶺嶠元游騎至力戰病臂創而卒 豫章書

按林志宜仲作宜中又不敘其起義事

趙時侑字謙甫奉新人宗室子以詞賦登開慶進士由新淦尉改興國軍大治尉郡守以修築郡城委之帥聞責其不稟命與郡守俱以罪聞再調廣東連山尉受經略司檄平潮州等處蠻寇有功就知南海縣事祥興元年崖山行朝潰與幼主同沉于海 林志

羅一理字循叟進賢人咸淳鄉舉謝枋得為江西招諭使舉

兵恢復一理偕弟起潛赴義受擒不屈皆要斬起潛臨刑顧謂一理曰今日得死所矣既歿面皆如生

豫章書

周應合武寧人曾祖世修故居九江為江西轉運使值歲歉發廩賑饑奏減征賦民甚德之因家于武寧有八子友賢友直友能友仁友信友諒友聞友端以孝義聞寧宗御書棣華以賜之友賢為敷文閣學士應合即其孫也淳祐進士任江陵府教授入為翰林修撰以疏斥賈似道謫饒州通判終朝奉大夫

人物志

李登字仲圭豐城人紹定鄉薦授耒陽主簿時湖南被兵列城震恐守臣委登督修城壘規畫有方不數旬竣事民不知役再調吉水丞經界方行覈田高下以定則等賦均而民樂辦及得代郡守魏峙知登清貧檄令受納秋辦資例

以賙歸橐登代至即行秋毫無取

林志

范嚴字子嚴豐城人淳祐進士方試禮部即伏闕陳十事既登第復上書言可為治世惜者五謂公論脈絕正人引去輕厭學校庇護蒿之創龍翔觀可為明主危者六謂敵國窺江寇循海道楮幣折閱浙右盜賊軍驕而紀律不嚴拒言而人不敢諫豐豐萬餘言仕至臨川主簿

人物志

熊大經字仲常豐城人寶祐鄉薦主建陽簿時劉克莊為知縣大經推誠贊理見義勇為克莊嘗遺書曰某試邑匪才惟主簿忠告善道藉手寡過為力孔多轉知龍泉縣廣西

憲司幹有胖齋集

豫章書

徐思立字志夫豐城人景定進士除南雄教授改臨江時丁大全植黨橫甚太學諸生伏闕攻之有旨戒諭立石學宮

思立為書抵祭酒反覆萬言請轉聞以伸公論于是十年不得志德祐初改奉議郎尋除武學博士有山房雜著若干卷

林志

徐子端字克之豐城人鹿卿之子以廕入仕初調監烏青鎮時更造楮幣漕司責以日解楮葉千斤吏牒旁午子端謂非庶土所有累請得免轉黃州推官知善化縣歷官所在見稱及宋運革杜門讀書作後泉散人傳引蔡季通獨行不愧影獨寢不愧衾之語以自擬有後泉集

人物志

舒嗣隆邦佐六代孫幼有才識器量以廣東帥閻掾歷官奉議大夫初從元帥征徭有數百人伏道左曰吾等為徭所掠聞大軍至即繫妻子歸善地嗣隆曰勿恐既而帥至命悉斬之嗣隆曰聖旨但令收捕叛人無勦降民之理帥乃

從之旬日徭拒命省文罪帥違慢以徭至不戮罪在嗣隆

嗣隆曰吾寧受罪不可違旨遂與立限破徭而歸

林志

孫義字伯隆豐城人於書無所不讀尤精于曆每謂治曆當

備三法曰象曰器曰數因圖寫古今七十六家法作大曆

賦又謂知曆者不可以不知星知星者不可以不知曆折

衷各家之言作太極圖及清室類考復古耆傳

同上

徐端字矩叔豐城人弱冠以文學見知所著有易發揮莊子

章句晚歲號絜矩病叟敘平生大略授其子俟屬續刻石

表墓自作祭文挽歌超然無所芥蒂一日手錄忠孝大致

數百言集家人對酒索筆書曰若以為了多少未了以為

未了何時而了題曰了了道人自贊投筆而逝

同上

按人物志作徐端方與林志異

陰幼遇字時夫奉新人家數百口五世同居登寶祐九經科
入元不仕父鄉貢士應夢授以凡例幼遇著韻府羣玉若
干卷兄中夫幼達復為注釋若干卷傳于世應夢號竹塹
幼達號復春幼遇號勁弦

人物志

按陰幼遇南昌耆舊記林志俱以為元人

陳友沅字直翁豐城人篤學力行景定鄉舉時兵興毀家給
民伍捍鄰寇渠魁就殲脅從者悉舍之人以為德所著有
春秋集傳等書

林志

黃千能字必強豐城人刻意讀書嘗謂皇極九疇之統漢儒
舉以參五事配六極則失之妄作皇極要論謂古今地理
無一定之形神禹疏河之故道蕪沒而難考作禹貢圖說
雜著尤多

同上

余玠字義夫分寧人僑寓蘄州少為白鹿洞諸生入趙葵幕
為制置司參議官嘉熙間與元兵戰於汴城河陰有功授
直華文閣歷官四川安撫制置使至蜀招賢禮士與之謀
議修築要害城隍屯兵聚糧為必守計旋率諸將直擣興
元與北兵大戰於嘉定利州都統王夔號王夜叉素殘悍
不受節度聞玠至以所部兵來謁班聲如雷舟中眾皆失
色玠部分自若夔退曰儒者乃有此人尋設策召夔計事
斬之軍中帖然會戎州帥欲舉統制姚世安為代玠不許
世安倚謝丞相內援遂以微罪中玠召還齋志而歿

安志

按宋史余玠蘄州人安志府志州志俱載分寧人僑寓
蘄州前志不載今採補

徐定字子固豐城人父國和與兄國會義居三紀有交木連

理之異國和卒定廬墓三年晝夜不絕哭家有紅紫牡丹忽變白華定卒子子義未弱冠居喪足不履閨闈里中號定為大孝子子義為小孝子曾孫傅霖字高澤事親孝謹居喪如制人謂徐氏世襲孝子 安志

按前志以國和為定之字又以國會為定父今改正

王友仲武寧人淳祐七年父病劇割股作肉糜以進病尋愈

有司表為篤孝之門 安志

王汝正武寧人咸淳中母病篤刲股煮以進母遂愈 同上

按安志尚有豐城何穆孫儼雷璲范文柔何章王義端分寧黃薰俱以孝義著附錄於此

宗必應字子固南昌人景定進士歷官江西招討司計議元克真州徇江南招討劉槃欲以江西城降必應不可曰德

祐之初降元者劉權致無為軍失守今文開府經略西南

劉洙亦自省起兵往會可謂義舉明公不劉洙是効而効

劉權此何為者且能戰則戰不戰則死李廷芝姜才獨不

可與同不朽乎槃不聽必應遂避去人皆壯之 府志

宗必經字子文南昌人景定進士授靖安知縣調萬安轉判

瑞州晉潛藩兵副與樞密陳宜中不合謝歸及宋祚革元

世祖詔求江南人士留夢炎程文海交薦謝枋得等二十

餘人子文與焉固辭迫脅以去械至元都繫獄三歲乃放

還著玉溪集詩文雅淡有陶靖節風 同上

趙汝暨字及之新建人以父善恪廕授明州錄事參軍有執

平民為殺人盜者獄具汝暨直其冤繼獲真盜寶祐間帥

閩忤丁大全奉祠歸後趙葵宣撫江東西薦知鄉郡兼領

漕遂置庫贍宗糴穀賑荒改知靜江及廣州俱有善政累進工部尚書

林志

胡霆桂字直翁進賢人開慶進士為鉛山主簿公清嚴毅時私醋之禁甚嚴有婦訴其姑私釀者霆桂詰之曰汝與姑和乎曰和曰然則汝能代姑受責矣以私醋律笞之政化遂行宗室寓居多不輸田賦霆桂繩以法卒為所誣免歸著書自娛天經地志禮樂名物及醫藥卜筮之書無不究覈號寬居先生

同上

胡文舉字仲明進賢人寶祐進士主寧國軍簿調贛縣尉先是有訴殺人而失屍并不見殺者文舉至方下其事一日池有尸無首文舉詢死者之母云臂有涅虎視尸果然又廉得其妻嘗與其男子通急召男子別鞠其妻妻疑事泄

言實與男子姦共殺夫而薶其首掘得首加屍如生成咸以為神自是臺省疑獄多以屬文舉所平反居多辟州錄事參軍授浮梁縣丞卒于官

同上

徐伯琛字通父豐城人師清江張洽洽以其子妻之嘗語伯琛曰讀書自有解處須盡捐富貴習見自識聖賢之心讀論語則如親見孔子讀孟子則如親見孟子因言求意方不枉讀伯琛受教服勤數年修身踐言如恐不及聚書甚富建閱浩閣以貯之景定中授迪功郎卒年九十三

同上

楊龍偉字卿雲進賢人咸淳進士授鄱縣主簿時信州軍亂提刑檄龍偉往視戮首惡數人餘皆釋之邑大饑民相聚為盜故事義倉非朝命雖持節使及有朝命而無臺檄者皆不敢擅發龍偉曰事急矣獲罪所不辭也乃發廩以賑

之民遂安

同上

余炎午字光伯奉新人咸淳進士知漢陽縣以文學才幹稱

秩滿安撫使徐安民辟湖北又奏留兼權機密在幕府有

武弁恃勢為民害炎午執擬甚堅軍帥不能撓宋亡教諭

鄉邑暇日與賓友賡酬吟咏自命為平淡集

白志

熊汝屋字兌大豐城人咸淳進士授崇陽主簿九經不釋手

一月一過讀李義山嘗執經於其父瑁之門及義山漕湖

南汝屋留其閣中有僧以楮鏹萬緡求通關節汝屋毅然

曰吾與李公世道義交何可以利相浼耶

林志

黃啻字子耕分寧人嘗從朱晦庵學咸淳進士知廬陽縣五

溪獠獷悍因為詩諭之獠感悅莫敢違命累遷知台州訪

謝良佐子孫之播越者收而教之為濟糴倉及抵當庫葬

民之棲寄暴露者又剏安濟坊以居病囚葉適嘗謂其條

目建置憂民如家遷知袁州所著有復齋集

同上

揭道孫字志道豐城人治進士業下筆千餘言值世革技無

所施因徜徉山水痛飲狂歌繼以太息教授鄉里每食舍

肉將歸遺親親歿事兄如父事姊如母姊寡有子十歲被

俘徧求弗獲養姊於家終其身作堂名廣思歲時於堂中

序族年逾四十而鰥不再娶

同上

吳仲軒進賢人度宗時第進士語江萬里曰國步日蹙吾不

復仕矣遂歸隱教授于鄉四方從遊者眾侍御史程鉅夫

疏薦不起

同上

按舊志載有章鑑傳鑑位丞相無善可錄及兵逼臨安

託故徑去有玷人物今削

陳煥字詩可豐城人博學和易黃謙父重其人爲築館居之
兩與鄉漕薦入元隱居巵山不仕取生平著述定爲易傳
宗書傳通詩傳微禮記釋四書補注嘗謂學者率信先儒
而疑夫子故講說必原夫子之意不苟隨先儒議論學者
號爲巵山先生

人物志

黃介字剛中分寧人意氣卓越善兵法帥鄉民登龍安山爲
保聚計元兵至砦介堅守不去顧謂家童陳力曰爾盡力
勿走力曰主在死生同之介身被鏃如蝟面頸腹中十三
矢倚柵而死力亦死妻劉被掠子用中獲免及長求母逾
十年得于京以歸州里稱黃孝子云

林志

徐子中字益之豐城人子端之弟繇承務郎監黃花鎮德祐
初元兵陷當塗子中閤門死之

豫章書

胡敬方分寧人任臨江路僉判元兵至率衆死守屢拒戰誘
之不肯降及城破元將張弘範執至瑞州不屈而死弘範
函其首而去家人以身歸葬焉

同上

趙若煥字堯章宗室子也居進賢年二十三值國運革賦草
之茂三章援琴而歌與箕子麥秀同悲所著有中庸講義
適情小橐逸民自得合若干卷平居未嘗免冠褰裳嗜酒
不至醉每微酣令人歌淵明歸去來辭自吹洞簫以和之
年八十卒

林志

徐欽字汝敬豐城人家藏書數萬卷無不覽記通六經工詞
賦試胄監參太學明善齋內侍董宋臣除押班主管太廟
及國信所都大提點欽率同舍生抗疏謂國信不可付闔
寺內臣不可預兵權主管太廟不可用刑餘不祥之人疏

入不報入元不仕開梧陽精舍集生徒延老成為之師羣盜過門皆斂戢去同

孫素字少初豐城人咸淳末以進士貢不第平生多撰述詩文若干首清江皮潛為刻板以傳吳草廬有序吳文正集

王用龍字震叔進賢人宋亡誓不為異國民時謝枋得招諭江西用龍檄眾往附其詞曰以燕人而伐燕全趙璧而歸

趙為元鎮守兵所獲家人饋食至碎瓮器劇吭而死豫章書

趙德宋宗室博學工文舉進士宋亡隱居南昌之東湖自號

鐵峰嘗著四書箋義五經辨說行于世林志

按趙德所著書世所傳者惟詩經辨說一卷附刻朱孟章詩疑問之後林志以為辨疑者譌

元

洪淵號沐齋豐城人宋鄉貢進士仕元為儒學教授少攻進士業晚耽邵子易學揭先天方圓圖于屋壁扁曰環中年

八十一而卒所著有環中集十卷其文援引該博議論贍蔚如江漢波瀾衮衮不竭吳文正集

按洪淵林志南昌耆舊記豫章書安志俱不載白志采吳草廬洪先生文集序補撰

揭來成字哲夫富州人倓斯之父宋鄉貢以子貴累贈通奉

大夫江西行省參政仁宗朝集賢學士陳顥等上言翰林揭倓斯之父來成學行師表一方宜特賜謚以示尚德之

意有旨賜謚貞文先生處士易名之典自來成始歐陽原

功集

王義山字元高富州人學工詞賦宋景定進士知新喻縣歷
永州戶曹湘潭縣豪與李氏爭田不遂獻之學義山引春
秋齊人來歸汶陽之田書來歸者心悅而歸者也李非心
服先聖其肯受乎以還李姓湘俗信巫歲用人以奉淫祀
事覺止罪祭者不及巫義山謂巫實殺人按而法之其風
遂殄入元提舉江西學事退老東湖之上環所居皆種蓮
名其堂曰君子又于先廬之側扁其所曰稼村學者稱稼
村先生所著有稼村類藁

林志

按王義山林志入宋白志改入元羅整庵有稼村類藁
後序

龔日新字中季南昌人十歲通進士業有能聲十五始去舊
業由周程張朱之說以求達夫孔孟至元中分教進賢邑

人翕然師之 揭文安集

熊朋來字與可富州人宋咸淳進士授寶慶僉判未任而國
亡元初以薦為福州廬陵兩學教授所至講論經義考古
篆籀文字學者化焉調建安主簿不赴晚以福清州判官
致仕朋來之學深于三禮當時言禮學者咸宗之每歎詩
樂無傳仿朱子所得趙彥肅家二十四譜增二十詩俾皆
可歌又補孔廟釋奠升歌樂章部使者以之遍行于諸郡
嘗譜考槃蒹葭衡門白駒四詩以寓已意學者稱為天慵
先生所著有小學標注瑟譜及天慵文集三十卷第召子
字南豐博覽載籍鄉里稱靖邑先生子太古鄉貢士為翰
林編修國子助教後隱櫛山明初徵校雅樂告老歸

志

按熊朋來林志豫章書譌入宋

雷光霆字友光寧州人居教授學士程鉅夫詹天遊皆其徒也著九經緝義五十卷史子辨三十卷詩義指南十七卷至元間遣使徵未至卒學者稱爲龍光先生

同上

程以臨字至可寧州人至元間除將仕郎辭不就天資超悟凡經史百家天文地理諸書靡不通貫尤長于詩構別野閉戶讀書老而彌篤選編漢魏唐宋諸詩名曰刪後正音所著有瓢丸小集擬古集

同上

廖立孫字幼興豐城人至元十九年鄉寇大作立孫負母冒白刃逃難及安靖孝養終身及卒揭曼碩題其墓曰有元純孝廖立孫之墓又作詩刻石有如昔江革遭亂離負母逃潛經險阻之句

林志

揭傒斯字曼碩龍興富州人幼貧讀書刻苦父子自爲師友貫通百氏早有文名大德間出游湘漢湖南帥趙淇雅號知人見之曰他日翰苑名流也程鉅夫盧摯先後爲湖南憲長咸器重之薦于朝特授國史院編修官應奉翰林文字遷國子助教南歸省母旋復召還凡三入翰林臺閣之儀靡不閑習天曆初開奎章閣首擢爲授經郎以教勲戚大臣子孫文宗時幸閣中有所咨訪奏對稱旨恒以字呼之而不名每中書奏用儒臣必問曰其材何如揭曼碩間出所上太平政要策以示臺臣曰此朕授經郎揭曼碩所進也其見親重如此富州地不產金官府惑於姦民之言爲募淘金戶三百而以其人總之散往他郡采金以獻歲課自四兩累增至四十九兩其人旣死而三百戶所存無

什一有司遂責民之受役於官者代輸多以是破產中書
因僖斯言遂蠲其征與修經世大典特授藝文監丞參檢
校書籍事元統初遷翰林待制集賢學士及開經筵再陞
侍講學士同知經筵事經筵無專官曰領曰知多宰執大
臣微辭奧義必屬僖斯訂定而後進其言往往寓獻替之
誠務以裨益治道年七十致其事而去詔遣使追及於鄆
南還撰明宗神御殿碑修遼金宋三史僖斯與為總裁官
毅然以筆削自任凡政事得失人材賢否一律以是非之
公至於物論之不齊必反覆辨論以求歸於至當遼史成
有旨獎諭仍督早成金宋二史僖斯留宿史館朝夕不敢
休因得寒疾卒追封豫章郡公謚文安僖斯少處窮約暨
有祿入衣食稍逾於前輒愀然曰吾親未嘗享是平生清

儉至老不渝友于兄弟始無間言為文章敘事嚴整語

簡而當詩尤清婉麗密善楷書行草朝廷大典冊及元勳

茂德當得銘辭者必以命焉

元史

按揭僖斯傳林志太略白志據史節錄

熊凱字舜夫南昌人從饒應中學得雙峰之傳以明經開塾

四十餘年時稱遙溪先生門人同邑梅邊熊良輔最知名

舉延祐鄉試有易傳集疏風雅遺音小學三書林志

李廷瑞字雲紀豐城人積學敦行為時所重教諭新建廣昌

兩庠師範比于安定徙長南劍延平書院以母春秋高辭

不赴母歿廬墓有白蓮生廬前田畝中華葉蕃盛人皆歎

異之

人物志

夏景孫字權可寧州人幼勤敏博通經史事父至孝旦暮必

溫清問起居飲食必親調後執父喪一遵禮制時稱巨孝
先生進士余貞師事之貞在翰林與修史以景孫薦于朝
未及拜命而卒

林志

余貞字復卿寧州人事父孝每事必咨稟而後行舉泰定進
士授上海丞知棗陽縣皆以政聲聞及還四方學士執經
從者甚衆至元間以翰林修撰召修宋遼金三史史成乞
歸養途聞父訃痛哭跣行數百里居喪盡制哀毀骨立有
司上其行于省府未幾寢疾卒

同上

龔煥字幼文進賢人通五經師饒應中以明體反躬為務時
科舉未行文章猶尚華靡煥獨與學者議曰苟以科舉必
遵朱氏之學其程式皆預為擬定煥歿而科目興一如其
言居泉嶺下人稱為泉峰先生

同上

包希魯字魯伯進賢人穎異絕倫嘗授今古文尚書于吳草
廬動履端嚴為後進楷法其教人先德行後文藝士習為
之一新及歿門人私謚曰忠文先生所著有四書凡例易
九卦衍義詩小序辨說文解字補義及原教說儒等篇門
人傳箕王槐最著箕字拱辰進士任延平路錄事轉本縣
尹政尚廉平人咸慕之洪武間召不起槐別有傳

人物志

集

同上

龔道源字士元新建人刻苦讀書教授鄉里弟子從者甚盛
著雲山夜話集以釋五經未明之義世號碧梧先生

白志

按林志以碧梧為龔道源名者譌

丁儼字主敬新建人游吳草廬澄門草廬禮之為製主敬字
說范梈嘗拊其背曰有美君子如金如玉吾不及也母病
侍湯藥不解帶者兩月及喪哀毀幾絕時吏督鹽直榜笞
無虛日乃傾貲以代輸撫鄒氏孤子命為娶婦而教誨之
手編金閨彞訓八卷及著小溪集四卷寓興十卷授龍興
酒務大使值兵變未任卒于家

林志

朱本字致真富州人至正間授福州路儒學提舉途遇寇妻
袁氏義不受辱死遂終身不取洪武初薦至京辭官歸所

著有四書皇極經世太極圖通書解

白志

劉文質字彬卿豫章人讀書不泥章句務在躬行年踰三十
以薦為繕工司照磨轉詹事院管勾府正司典簿中書左
丞史克新戍遼陽時江南餉道絕各屯田以食軍士食且

不給廷議欲徵其米五萬石人難之不敢往文質毅然請
行至軍為陳利害眾咸感動卒致三千四百斛以歸時官
牛多掠于亂兵貧窶人無所訴富有有力者反指為口實沒
去牛羊失其租文質舍乘傳偽衣醫者服徒行民間廉其
實以聞徵富人租而復貧窶之家京南諸倉不以時入糧
民告病文質馳驛察之徧詢倉之前後盡得其情遠近不
待督而事集已而入都水監為丞陞少監性耿介不阿初
至燕客塔海平章家勸其納少室以奉巾櫛答曰家有糟
糠之妻相期至髮白肯中道棄之乎其子時敏方幼一少
年誘其馳馬竟跌死或語文質宜訟文質曰吾兒死生有
定命可尤人邪經一晝夜忽自蘇凡出使即呼官錄其行
橐且曰歸時苟增其一即賊也尤善以形色言人吉凶巧

發奇中無毫髮差人有意問之輒固閉不答貌奇古眉毫長寸許雙目深其瞳閃閃照人年七十餘今猶聞其騎青驢出入于豫章山中云 宋學士集

按劉文質事林志豫章書俱畧白志據宋潛溪所撰本傳稍加刪節

熊東字季隆南昌人凱之子嗣守家傳從游者眾其為學堅苦篤信以四書五經為日用飲食造詣高遠踐履平實後辟臨川學正不就同邑熊原字孟和受學于東號端學先生又有王復亨深明易理鄧紹先博雅工詩王楫穎悟善屬文先後皆以經學教授南昌 人物志
熊復字庶可新建人以五經教授鄉里四方來學者常數百人著春秋成紀以惠後進門人稱為西雨先生時富州陳

仲易亦以經術授徒于郡城杏花邨 同上

陽霖字伯雨龍興新建人早喪父事母至孝母嘗病熱更數醫弗能効不肯飲藥曰惟得冰我疾乃可愈爾時天氣甚燠霖求冰不得累日號哭于池上忽聞池中戛戛有聲拭淚視之乃冰斲也亟取以奉母其疾果愈 元史

按陽霖林志作湯霖

李克家字肖翁富州人嘗建同文書院于州城之東以訓鄉子弟任本學教諭遷遼陽儒學提舉著有續豐水志 人物志

楊顯民南昌人力學操行通古今之務家甚貧蕭然吟咏以自樂不肯就元科目余闕稱為南州有道之士所著有水北山房集 同上

熊師賢字君佐富州人元廢科舉師賢絕意仕進誦讀自娛
扁其堂曰寓樂琴書圖畫羅列左右尤嗜古器玩嘗學琴
後不復操曰但識琴中趣耳生平專力於詩吳文正謂賢
詩沖淡蕭散不事雕琢而近自然酷與其人相似同上

舒公平字廉夫靖安人宋衡州錄事參軍邦佐之後延祐間
官定戶籍公平奉命總復靖安諸鄉凡有田不稅無田虛
稅之家悉以實報蒙惠者甚衆捕寇官軍至縣俘男女百
餘公平捐貲飲食之言于主帥多獲免遇歲饑輒竭所積
賑貸且命工斲材以給死而無棺者遠近深德之博涉經
史於春秋尤邃然不苟作注釋每評論宋文推蘇明允第
一學者稱之曰平山先生同上

文殊海涯字貫通南昌人元至正間監延平尤溪縣廉介明
敏邑有陳十軍陳合一者素獷悍各聚黨為亂海涯捕其
渠魁置于法餘黨盡宥之尤重儒雅興學校增置弟子員
凡鄉社俱令立學擇師儒以主教事士子感慕為立祠于

南溪書院

同上

伯顏子中其先西域人後仕江西因家焉子中明春秋五舉
有司不第行省辟授東湖書院山長遷建昌教授江西盜
起授分省都事使守贛州而陳友諒兵已破贛子中倉卒
募吏民與鬪城下不勝脫身間道走閩陳友定素知之辟
授行省員外郎出奇計復建昌浮海如元都獻捷持節發
廣東何真兵救閩至則廖將軍永忠已降何真子中跳墮
馬折一足致軍前永忠欲脅降之終不屈義而舍之乃變
姓名冠黃冠游行江湖間太祖求之不得簿錄其妻子子

中竟不出久之事寔解乃還故里洪武十二年詔令郡縣
舉元遺民將官之不應者論重辟布政使沈立本密言子
中于朝詔以幣聘使者至子中太息曰死晚矣為歌七章
飲醕而死 元史

按朱一齋為子中作傳敘述校史加詳核七歌載在傳
中

舒慶遠字伯原靖安人至正鄉舉授贛州學正調主濂溪書
院未赴紅巾寇起攻靖安慶遠迎監縣潮海倡義拒敵繕
兵儲糧召募勇敢為固守計潮海敗死省府即署慶遠攝
縣自是每寇至輒偕鄉進士胡斗元涂淵勇士黃雲與戰
却之寇忿甚合圍益急慶遠力匱被執中途脫歸以憂憤
卒有摠閱錄一卷 安志

按舒慶遠林志不載南昌死義傳亦失載

陰用炤字用光奉新人元季為臨汝書院學長聚徒數百人
講心性之學永樂中纂四書大全多采其語 人物志

程翼字於敬寧州人登至正鄉舉任新淦州學正避兵歸隱
與同郡胡季安朱善為友其教人以孝弟為修身之本勤
苦為讀書之本廉謹為居官之本門人石彥誠艾旭最著

同上

熊仕重南昌人號梅邊居士結屋梅下讀易有咏梅詩百首

同上

熊自得字夢祥富州人博聞強記善繪事得米老家法而興
致幽遠元末召至都授大都路儒學提舉崇文監丞著有
析津志 同上

揭汝字伯防富州人侯斯之子工古文詞善書以廕補祕書郎遷國史編修歷官至福建廉訪司使守建寧偽漢陳友諒兵寇松關建寧受圍吏民相繼出奔汝與經略使普顏不花協謀禦賊設方略復延平等三州改江西行省未赴以工部郎中召時淮浙亂道不通留家明州之慈谿與子樞浮海趨遼東制授刑部侍郎洪武間召至鳳陽書皇陵碑竣賜金放還 同上

黃翊字孟翔新建人通春秋工屬文元末罷進士遂棄舉業受大府辟為廬陵郡掾性剛勁事礙于法輒抱案歷階而升摘其語與上官議反覆相鉤連上官怒斥之屹立不少動已而卒如翊言至正壬辰大盜起斬黃將及郡郡二千石與官皆散走翊獨止孔子廟堂盜獲之知為府掾強之

仕使行官書翊罵曰我死即死其能官于賊邪盜怒反接于樹歷一日意其自悔抽刀礪頸曰從則祿不從則血澆吾刀矣翊大罵甚于初賊砍首而去 宋學士集

朱隱老字子方富州人其學以聖賢為宗尤研精易禮及邵子先天橫渠正蒙諸書所著有易說禮說皇極經世書說平生一踐場屋不中遂棄去倡道于荷山之陽四方學子悉從之游稱濤山先生至正壬辰春江淮兵動鄉里惡少年為變殺戮至雞犬隱老猶操觚正衣冠而坐從容語抄掠者曰貲財任取書籍非汝所好也及後再至三至隱老曰吾家已罄矣爾幸他之盜笑而去臨歿語其子善曰吾以數推明年江西當大變宜謹避以免難語訖而逝及偽漢陳友諒陷南昌果如其言 同上

按瀟山先生為一齋之父一齋以文章受知于明太祖
家學淵源宋潛溪所撰墓志極相推重非泯泯無聞者
林志安志俱不載白志補入

范復亨字顏卿南昌人元舉進士不第省署吉水等州都目
後歐陽祥彭瑩合寇素州復亨募集義兵力戰死

林志

熊釗字伯幾進賢人至正甲申以春秋領鄉薦授崇仁學官
遷進賢壬辰徐壽輝兵圍龍興釗與樊復合謀倡義立營
柵阻湖以守北山時郡城被攻甚急外援不至釗出奇兵
與戰連捷賊黨稍却夜遣壯士持羽書入告城中得報乃
并力出擊圍解省臣嘉其功承制授臨江路知事遷江西
儒學副提舉城陷避之臨川偽漢陳友諒欲羅致之釗匿
山澤中得免洪武間名校書會同館賜宴著學庸私錄論

孟類編春秋啓鑰

白志

胡明甫南昌人至正間江西寇起行省平章道童於龍興路
城內四廂廂設一官列巷各置一長又編民兵為十七屯
環列城上與廂巷之兵相為聲援明甫以才能選任廂官
壬辰蘄黃賊鄒普勝擁眾圍龍興城明甫協助城中堅守
屢出奇縛賊賊遂敗去以功授奉新尉尋升龍興路判

安志

朱仁靖安人至正間母劉氏病篤醫禱無應于是割股取肝
救母得活有司立精孝坊表之

林志

孫民憲肇慶路總管伯顏次子紅巾盜起奉檄起兵討之攻
油磔寨奮勇爭先沒于陣全普庵撒里表其門曰尚義

至正南昌死義傳

楊壽字季子龍興人家世以文學稱壽以工詩與兄鎰齊名至正初用薦以布衣入史館為校勘史事畢調唐元衛教授歷中書檢校官時天下多故朝廷遣名臣經畧江南得承制行事壽辟從事以行至閩道以疾卒鎰詩淳厚典則浸淫漢魏壽詩視其兄各自名家其冲邃幽靚之思往往能道人之所不能言

王忠文季子詩篇序

胡斗元字元浩靖安人至正十年領江西鄉薦第一署鰲溪書院山長賊至靖安掠斗元鄉里斗元以鄉兵擊敗之入縣治與潮海共圖戰守及潮海被執賊脅之使降斗元罵不屈乃以土糞其腰不死又縛置暗室斗元仆牆以出逃入深山而死

元史

湯盤字又新龍興路人至正丙申除寧州判官先是州治為

張普憲所陷州判楊宗訓戰死普憲使其黨余茂功屯守盤聞命會義士吳德潤等募義兵克復州治生擒余茂功誅之未幾茂功之黨余祐二聚眾復來盤出戰力屈為賊所殺定江巡檢汴梁劉儼亦死于難

至正南昌死義傳

吳德文吳德機莫以中俱寧州人至正間永興賊張普憲合

武寧賊盧昌瑞寧州賊余有慶侵州境德文等集義兵從州判楊宗訓守武昌界與賊戰于南樓嶺宗訓戰敗德文以中等復統兵從宗訓收捕與賊戰于黃岡累勝乘虛追逐賊伏四起宗訓謂德文曰我世受國恩報國是此時也若等各宜逃生德文等泣曰相公既不負國我輩豈敢負相公誓與同死於是奮戰宗訓被殺德文德機以中力屈就擒以中奪監押人刀自刎德文德機俱死之

同上

江西通志 卷六十七
祝興可寧州人世業儒草寇殘破州治率鄉丁於本都吳僊里接應州判楊宗訓以圖恢復值寇余祐二等來攻興可戰敗奔總兵阜溪張軍前求救張與二千餘人興可大破祐二千于西峽橋俘馘數百祐二遁後又同余天常統義兵搜捕祐二以火爆其巖石擒殺之餘寇吳娘子劉院判至高嶺復與興可遇力屈遂為賊擒罵不輟口死同上胡紹遠武寧人至正壬辰外寇侵燬縣治居民四逸紹遠兄弟五人倡義聚眾保障鄉閭賴之而安者五載江西右平章道童左平章火你赤差官齎禮幣特加慰勞己亥秋與僞漢陳友諒兵戰于建昌之麻潭不勝兄弟皆死之鄉里立祠塑像以祀焉同上

按安志所載尚有靖安朱仁二進賢吳孔昭萬毅三人

俱以孝義著附錄姓名于此

樊復字明仲進賢人幼警敏好學有大志至正間寇攻郡城江東之黨操舟應之明仲率弟文仲姪用行屯兵下流禦之力戰獲其渠魁未幾寇攻北山明仲復戰于新墟力不支與弟姪死于新橋事聞贈明仲進賢尹文仲臨川丞用行崇仁簿同上

楊行道字中道龍偉子操行純篤有萬姓者遺珠於塗行道俟其至還之外親有兄弟訟田聞行道一言感而相讓盜過其里戒勿驚楊宣教學士虞伯生序而傳之安志

按龍偉進賢人安志誤列行道于撫州撫州府志亦誤今改入

併列篋字世德龍興人父文質官於江西遂家焉列篋兄弟

五人俱登第其第號五桂坊列箎由翰林出監海潮州有
惠政罷歸至正間紅巾寇起攻郡城列箎奉檄掌北門之
管既奉命往別道士陳白雲曰予世為忠臣兵事不可測
誓不辱國辱先請以身後為託歸具牲酒酹祖墓囑妻孥
曰城倘不守爾等當即赴池井勿污賊城陷列箎投井死
妻妾子女死者十一人明日道士乃浚井竭池求屍具棺
槨以葬弟玉立至正中監泉州以政績著府志

按科日志列箎兄弟俱以龍興籍登進士舊志列于寓

賢今改入

趙祖全豫章人僑寓富順隱居讀書志行純潔鄉閭以為矜
式善屬文凡郡邑碑刻多出其手四川流寓志

黃沖字季中南昌人至正間汝潁江淮盜起渡江陷江州南

康至龍興城下官軍與戰敗績時守吏狎於承平束手無
措惟沖驍勇率下每戰有功後朝廷遣使置義兵將校遂
授沖左義兵副千戶官昭信校尉佩白金虎符廉訪使吳
當奉詔招捕即召沖從征沖曰自羣逆摧却省府政治日
懈使君能布宣天子恩威民可得也會火你赤攻奉新靖
安其將疾沖不與已合誘致議事遂被害論者惜之白志
按弘簡錄偽漢陷城火尼赤道沖悉健勇來援為叛將
所殺閱六月父得其元葬焉與此不合

鄧椿字伯壽奉新人任臨江路照磨領義兵從楊萬戶援江
西至豐城縣遇水寇力戰手殺數十人而死同上

舒泰奉新人至元進士居父喪一遵禮制虞集嘗云泰行古
道足以變世俗任分宜縣丞辨冤獄却虎患屏妖祟異政

可紀寇難起渠帥慕其才欲要致之不得後舉義眾破寇
兵為鄰境劇賊所乘泰被執怒罵不屈遂遇害

同上

毛鐸字仲聲龍興人至正間行省署為富州學正時土寇李
明道集眾據州治脅為從事鐸曰我故士人肯從爾為亂
乎明道曰若膝屈于我富貴立致鐸抗色曰我寧折首無

寧屈膝遂遇害

同上

徐穎字叔良進賢人元季遊京師從學於余廷心楊顯民程
以文僑居金陵龍鳳時為中書典籤太常博士

列朝詩傳

